

AWEMainta

E DIFERENCIA DEN NOTICIA

REVITALISACION DI SAN NICOLAS TA REMODELACION DI STACION DI ARUBUS



EDITORIAL

3

**NORMA ETICO PA PERIODISTANAN:
BERDAD, INTEGRIDAD Y
INDEPENDENCIA**

UN MIRADA CRITICO

4

**E PROMESANAN DI
EAGLE LNG PA ARUBA**

INTERNACIONAL

12

**DAÑANDO INFRASTRUCTURA Y HERIDANDO RESIDENTENAN
ATAKE DI MISIL
RUSO A SACUDI KYIV**




Stop Searching!

M-Files
Document Management

- System Neutral, Metadata Driven
- Cloud, On-Premises, or Hybrid
- Automated Workflows and Security
- Seamless Integration with: Microsoft Office,
- Dropbox, GoogleDrive, DocuSign, AdobeSign

Tel. 583-7072 | info@vcc-int.com | www.vcc-int.com



Revitalisacion di San Nicolas ta remodelacion di stacion di Arubus

AYERA mainta Minister di Asuntonan Economico, sr Geoffrey Wever, den presencia di su colega y lider di partido RAIZ, sr Ursell Arends durante un conferencia di prensa di gobierno, a haci e gran anuncio cu pronto gobierno lo “desvela e proyecto di revitalisacion di San Nicolas.

P’e proyecto aki, Gabinete Wever Croes II lo a pone un suma di 4.1 miyon florin un banda destina pa ehecucion di e proyecto aki cu segun Minister Wever, esaki ta un proyecto di vital importancia pa desaroyo di San Nicolas.

E prome fase cu e mandatario a anuncia como gran noticia pa pueblo di San Nicolas ta bisa:

“Fase 1 di e Proyecto di Revitalisacion di San Nicolas lo inclui e creacion di un Sunrise Market den e parkeerplaats actual di Arubus, mantencion y modernisacion di e terminal di bus, ampliacion di e espacio publico pa peaton, y e desaroyo di espacio publico cu posibilidad pa precario, pa asina por crea espacio pa terras y actividad di horeca.

Tambe lo tin mas iluminacion, matanan, y infraestructura cu ta atractivo pa bishitantenan.”

Fuera di e proyecto hotelero di Secrets, Gabinete Wever Croes I y II den casi 8 aña gobernando e pais, no a cumpli cu loke a wordo priminti na e bario di San Nicolas, esta di percura pa un desaroyo economico efectivo y duradero.

Al contrario ta mesun gobierno aki a dicidi di permiti e compania Mericano, CITGO, di anula un contract miyonario c’un balor di mas di 300 miyon dollar den caso cu e compania no cumpli cu e contract, habriendo e refineria di San Nicolas.

Loke Minister Wever a presenta den su conferencia di prensa di ayera mainta, ta un remodelacion di e parada di bus, na entrada di e caya principal di centro di San Nicolas cu ta un plan necesario ya cu pa ultimo ocho aña, ningun di dos gobierno di Premier Wever Croes, a inverti den mantencion di luganan publico of cu propiedadnan di gobierno.

Aki tin cu menciona cu mientras cu Minister di Energia, Glenbert Croes ta anuncia acuerdo cu e compania Mericano, ‘Armstrong Oil & Gas Inc.’ pa ehecuta exploracion di petroleo y gas den awanan rond di Aruba.

Sinembargo aki tampoco e maneho di gobierno ta muestra un of otro tipo di bon coordinacion ya cu mientras cu Minister ta



papia di posibilidad grandi pa e pais, e mesun gobierno aki di e mandatario, a percura pa henter e refineria di San Nicolas transforma su mes den un tipo di “junkyard” caminda ya tin bendemento di hero ta tumando luga sin cu esaki tin aprobacion di Parlamento. E anuncio di ayera mainta pa Minister Geoffrey Wever, ta bin net algun dia despues cu e mesun mandatario aki a informa cu combersacionnan ta bayendo riba un bon caminda pa loke ta e proyecto di ferry.

Un proyecto cu tin 7 aña den ‘pipeline’ ya cu e intencion di e proyecto di fast ferry aki, ya tabata for di e periodo di Gabinete Mike Eman y despues esaki a pasa pa Minister Chris Romero den e prome Gabinete di Prome Minister Wever Croes.

No tin indicacion concreto si realmente e fastferry aki lo bira realidad of no ya cu semper un di e exigencianan n e desaroyado di e proyecto aki, tabata existi pa gobierno di Aruba construi un waf na San Nicolas pa asina por duna servicio na e proyecto aki.

Awor despues di anuncia e fastferry algun dia atras, sr Wever ta presenta remodelacion di e stacion di Arubus pa un suma di 4.1 miyon florin, sin menciona e balor agrega pa esunnan cu ta biba na San Nicolas.

Minister Geoffrey Wever den presencia di Minister Ursell Arends a trata di convence tur hende mencionando lo siguiente: “E creacion di e Sunrise Market ta representa un oportunidad hopi bon pa agricultor y artesonan, pasobra lo tin suficiente espacio pa ofrece mercado pa productonan local, algo cu hopi tempo a wordo desea y ta necesario pa diversifica e atraccionnan di San Nicolas, no solamente pa turista, pero tambe pa esunnan local cu por disfruta di e area regularmente.”

EDITORIAL

Norma etico pa periodistanan:

Berdad, integridad y independencia

DEN un era di informacion rapido y atencion constante di media, e integridad di e profesion periodistico ta bou presion. **E Carta Etico Mundial pa Periodistanan ta ofrece un cuadro cla pa un actuacion periodistico etico.** E guia aki ta accentua e necesidad di reportahe veredicto, honestidad den e informacion obteni, y proteccion di e privacidad di individuonan. Door di sigui e normanan etico aki estrictamente, AWEMainta ta aspira na un sociedad unda e independencia di prensa ta keda garantisa, y e publico por confia riba reportahe confiabel y obhetivo.

Informacion veredicto y responsabilidad

E fundeshi di periodismo ta basa riba e respet p'e berdad y e derecho di e publico pa conoce esaki. Periodistanan tin e obligacion di investiga y publica di un manera honesto y preciso, semper haciendo un distincion cla entre informacion factual y opinionnan personal. Esaki ta segura cu e publico tin acceso na informacion confiabel y ta preveni engaño. Origen y Verificacion di Informacion

Un periodista mester solamente reporta riba hecho di cual e origen ta conoci y verificabel. Informacion esencial no mag wordo omiti y documentonan no mag wordo falsifica. Ora di uza medionan social, periodistanan mester ta extra cauteloso cu e validez y confiabilidad di e informacion cu nan ta distribui.

Metodonan honesto y transparencia

Metodonan honesto y etico ta crucial pa obtene informacion. Periodistanan mester semper revela nan rol como reportero y no mag haci grabacionnan scondi, a menos cu no tin otro manera pa obtene informacion importante. Esaki ta promove transparencia y ta preveni practicanan inhusto.

Prioridad di verificacion riba urgencia

Den periodismo, e necesidad pa publica rapidamente nunca mag bay a costo di e verificacion cuidadoso di hecho y fuentenan. Periodistanan mester segura cu nan ta presenta un imagen balansa door di duna esnan envolvi e oportunidad pa reacciona prome cu informacion wordo distribui.

Coreccionnan y transparencia

Ora erornan wordo descubri den informacion publica, t'e responsabilidad di e periodista pa rectifica esakinan rapi-



damente y completamente. Coreccionnan cla y visibel ta esencial pa garantisa e confiabilidad di medionan di noticia y mantene e confiansa di e publico. Proteccion di Privacidad y Independencia

Respet p'e privacidad y dignidad di individuonan ta un principio fundamental. Periodistanan mester segura cu e informacion cu nan ta colecta y publica ta respeta e bida priva di esnan envolvi. Ademá, periodistanan mester keda independiente di influencianan externo y no mag compromete nan integridad profesional.

E puntonan ariba menciona ta guianan esencial pa garantisa integridad y responsabilidad den periodismo. Door di mantene reportahe veredicto, transparencia den informacion, y respet pa privacidad, periodistanan ta aspira na un prensa confiabel y independiente. Sinembargo, e percepcion di e poblacion di Aruba ta sugeri cu e reglanan etico aki no semper ta wordo sigui. Ta crucial cu medionan di comunicacion y periodistanan ta sigui mantene e normanan mas halto pa recupera y fortalece e confiansa di e publico.

AWEMainta ta dedica su mes activamente pa trece un cambio positivo den e manera cu noticia ta wordo presenta na Aruba. Door di tene estrictamente n'e codigo etico pa periodistanan, nos ta aspira di bira un ehempel den e mundo di media. Nos ta kere den transparencia, integridad, y respet p'e berdad como e base di un prensa confiabel.

Door di brasa e balornan aki consistentemente, nos kier restaura y fortifica e confiansa di e publico, p'asina e habitantenan di Aruba por conta riba reportahe honesto, obhetivo y independiente. AWEMainta ta determina pa pone e standard pa integridad periodistico, cu e meta di crea un comunidad miho informa y responsabel.

Un mirada critico

E promesanan di Eagle LNG pa Aruba

EAGLE LNG a haci promesanan grandi n'e pueblo di Aruba cu su plannan pa desaroya un facilidad di gas natural riba e isla. Mientras cu e compania ta pinta un imagen di crecemento economico y beneficianan ambiental, ta esencial pa nos como Arubianonan evalua criticamente kico ta wordo ofreci y si e promesanan aki realmente lo materialisa.

Promesanan economico: Creacion di trabou y inversion

Eagle LNG ta priminti di inyecta 100 mion dollar den economia di Aruba, principalmente a traves di e construccion di e facilidad di gas natural. Nan ta afirma cu e inversion aki lo crea 80 pa 100 cupo di trabou den construccion den e termino corto y 10 pa 20 cupo di trabou permanente altamente specialisa unbes cu e facilidad ta operacional. E idea ta cu e cuponan di trabou aki lo yuda reduci desempleo y stimula e economia local.

E compania tambe ta sugeri cu e proyecto por hiba na aumento di trabou pa rolnan existente, manera capitan di waf y operadornan di makinaria, y posiblemente hasta mas cupo di trabou si e facilidad ta expande pa inclui exportacion di LNG y distribucion riba e isla. Pero cuanto di e cuponan di trabou aki realmente lo bay pa Arubianonan, y cuanto lo wordo yena pa specialistanan stranhero?

Promesanan ambiental: Energia mas limpi

Eagle LNG ta destaca e beneficianan ambiental di cambia pa gas natural. Nan ta priminti un reduccion significant den emisionnan dañino: 30% menos emision di CO₂, 90% menos materia particulado, 75% menos emision di NO_x, y un reduccion dramático di 99% den emisionnan di Sox. Nan ta afirma cu esaki lo yuda Aruba reduci su huella di carbon y mehora e calidad di aire, alineando cu metanan ambiental global.

Nan tambe ta papia tocante posibilidadnan futuro manera uza gas natural renobabel for di fuentenan manera dumpnan di desperdicio y eventualmente transiciona pa hidrogeno, cu ta wordo promociona como e energia di futuro. Pero e iniciativanan aki lo wordo realisa algun dia, of nan ta djis posibilidadnan distante?

Energia mas barata

Eagle LNG ta sigura nos cu cambia pa gas natural lo baha e costonan di energia. Nan ta afirma cu si LNG a wordo uza na 2019, e costonan di energia lo tabata 25-30% mas abou cu cu heavy fuel oil (HFO). E reduccion di gasto aki, nan ta bisa, lo wordo pasa p'e consumidornan, resultando den cobransanan di awa y coriente mas abou pa cas y negoshinan Arubiano.

Nan tambe ta sugeri cu un suministro stabiel di gas natural di Merca lo mantene e costonan aki abou a largo plazo, potencialmente atrayendo inversion stranhero y diversificando nos economia. Pero e reduccion den gasto aki realmente lo yega den nos saco, of nan lo wordo absorba pa otro costo y tarifanan?

Oportunidadnan nobo:

Un centro pa transporte maritimo moderno

Eagle LNG ta visualisa Aruba birando un centro pa transporte maritimo moderno y respetuoso di medio ambiente, danki na su infraestructura di LNG. Nan ta afirma cu esaki lo atrae e barconan crucero y barconan di container mas nobo cu ta funciona cu LNG, impulsando turismo y industrianan relaciona. Nan tambe ta mira potencial pa Aruba exporta LNG pa islanan bisiña, posicionando nos como un lider di energia regional.

Pero con realistico e oportunidadnan aki ta? Aruba realmente lo beneficia di e aumento di trafico aki, of nos lo carga e costonan mientras otronan ta beneficia?

E futuro: Pone e fundeshi pa hidrogeno

Finalmente, Eagle LNG ta papia tocante prepara Aruba p'e "Era di Gas," cu LNG como un trampolin pa solucionnan di energia ainda mas limpi manera hidrogeno. Nan ta sugeri cu e habilidad y infraestructura desaroya awor lo ta transferibel p'e tecnologia futuro aki.

Pero esaki ta djis un otro promesa pa un futuro distante, un cu por nunca yega na produccion?

Eagle LNG ta ofrece Aruba un vision di crecemento economico, mehoracion ambiental, y costonan di energia mas abou. Pero como Arubianonan, nos mester considera cuidadosamente si e promesanan aki lo wordo cumpli. E beneficianan realmente lo supera e costonan, of nos ta wordo bendi un futuro cu por nunca materialisa? Solamente tempo lo bisa si e promesanan aki ta mas cu djis proyecionnan yen di speranza.





MINI MEGA


MEGA PLUS

Cumpra bo Mini Mega y cu **Afl. 2,-** mas,
bo por gana e jackpot di

AFL.

1.500.000,-

Con?



Afl. 1.000.000,-

+



Afl. 500.000,-

www.lottoaruba.com



Pa mas informacion yama 525-7555 of bishita nos website lottoaruba.com

Mercát ta celebra su prome aniversario

Menu special, descuento, campaña y mucho mas!

MERCÁT, e restaurant Mediterraneo na Aruba Marriott Resort & Stellaris Casino ta orguyoso di anuncia su di prome aniversario durante e luna di September, marcando un año di excelencia culinario y experiencianan culinario inolvidabel. Pa conmemora e ocasion special aki, Mercát ta invita tur local y bishitante pa join nos pa un luna yena cu plato nan di delicia, descuentonan exclusivo, y tambe un campaña di social media cu un variedad di premionan atractivo!

Un Atributo Culinario Pa Chef Ehecutivo, Cristiano Guidetti



Durante September, e comunidad di Aruba ta invita pa bishita Mercát y asina disfruta di un menu especialmente prepara pa Mercát su Chef Ehecutivo, Cristiano Guidetti. E menu aki lo refleha e esencia autentico di e Mediterraneo cu sabornan cu a haci Mercát un di e destinacionnan favorito durante e ultimo año.

25% Di Descuento, Exclusivo Pa Localnan

Como un toke di aprecio n'e comunidad di Aruba y e sosten durante e ultimo año, Mercát lo ofrece 25% di descuento na tur local durante e luna di September. Simplemente presenta bo ID local y disfruta di e oferta aki ariba nos menunan 'A La Carte' durante breakfast, lunch, y dinner.

September 18: E Gran Dia

Ariba September 18, e dia di Mercát su prome aniversario, nos lo ta celebrando cu un variedad di oferta cu ta segura di deleita e paladar di nos clientenan. For di prosecco complimentary durante dinner y tambe un dessert unicamente disponibel ariba e dia di aniversario, no tin duda pakico esaki t'e dia perfecto pa celebra cu Mercát.



Gana Premionan Exclusivo Cu Nos Campaña Di Social Media

Join nos celebracion di aniversario online! Participa den nos campaña di social media dor di like nos pagina "MercatAruba", tag bo friends y share e post p'asina participa p'e chens di gana premionan fantastico manera un dinner pa cuater persona! Busca nos riba Facebook y Instagram: @mercataruba pa mas detaye!

Reflehando Ariba Un Año Di Exito

For di e momento cu a habri nos portanan, Mercát a bira un destinacion masha gusta pa ambos e localnan como tambe e bishitantenan disfrutando di nan estadia na Marriott y tambe esnan hospedando na Aruba. Nos compromiso pa sirbi cuminda fresco y di alto calidad, conhuntamente cu sabornan autentico di Mediterraneo a haci cu e restaurant a crea un audiencia loyal di sigui donan. Durante e ultimo año, Mercát



tabata anfitrión pa un cantidad di eventonan culinario conhuntamente cu chefnan renombra internacional, como tambe a ser reconoci como un di e top destinacionnan den e region segun e restaurant a forma parti di "Super Club", un programa di Marriott International cu ta concentra ariba asistiendo restaurantnan yega na haltura nobo di exito y reconocimiento. E programa aki ta ofrece un plataforma unico pa mehora su presencia. Segun nos ta celebra e logronan di e año, nos ta mantene tambe n'e dedicacion di entrega e miho servicio posibel y asina tambe premira hopi año mas di exito na caminda.

Mas Di Mercát

Mercát ta ofrece un experiencia Mediterraneo cu e posibilidad di sinta paden of pafo, cu bistanan di Aruba su beach. Cu un enfoque ariba cumindanan fresco, di calidad halto, y ingredientenan cu ta ofrece un sabor autentico, Mercát ta segura di presenta un experiencia culinario cu lo eleva tur bo sentidonan. Situa na Aruba Marriott Resort & Stellaris Casino, Mercát is habri tur dia for di 7AM – 12PM pa breakfast buffet y A La Carte, for di 12PM – 5PM pa lunch, y for di 5PM – 10PM pa dinner. Join nos y conoce e sabornan cu tanto ta wordo gaba. Yama nos na 520.6312 of busca nos riba OpenTable.



Aruba Marriott Resort

Aruba Marriott Resort & Stellaris Casino ta situa na Palm Beach y ta consisti di 414 camber cu balcon priva cu bista p'e pool relajante y rondona p'e awa blauw di lama. Huespednan cu ta desea exclusividad por haci reservacion n'e Tradewinds Club, un concepto di 'hotel den un hotel' di Aruba Marriott Resort. Ademá e hotel ta ofrece un 'adults only' pool cu ta brinda privacidad superior y tambe un variedad di restaurantnan cu ta garantiza un experiencia unico. P'esnan cu kier disfruta y relaha, por haci uzo di e casino mas espacioso na Aruba. Pa mas informacion por tuma contacto cu nos na 586-9000 of bishita www.arubamarriott.com. Tambe por bishita Aruba Marriott su Facebook y Instagram page: @arubamarriott

Mentalidad di corto plaso perdida di largo plaso

POLITICA na Aruba ta ser domina pa un mentalidad populista cu ta balora victorianan di corto plaso y apelacionnan superficial riba e buskeda di solucionnan significativo y duradero. E enfoque aki a compromete severamente e progreso di e isla, lagando nos cu un ambiente politico cu ta faborece gratificacion inmediato en bes di atende e retonan profundo cu nos ta enfrenta. Mientras Aruba ta lucha cu problemanan economico, social, y ambiental, e fayonan di gobernacion impulsa pa populismo ta bira cada bes mas aparente, haciendo crucial pa scrutina e prioridadnan robes di nos lidernan y nan incapacidad consistente pa cumpli cu promesanan.

Promesanan grandi, poco accion

Populismo ta prospera riba haci promesanan grandioso sin e responsabilidad di entrega resultadonan real. Na Aruba, esaki a hiba na un cultura politico unda lidernan frecuentemente ta propone plannan ambicioso—sea pa infraestructura, crecimiento economico, of bienestar social—solamente pa bandona nan unbes cu e emocion inicial desaparece. Ciclonan di eleccion a converti den un bucle sin fin di promesanan incumpli, lagando e electorado desilusiona y cada bes mas skeptico di cualkier progreso real.

E ciclo aki a resulta den un liderazgo cu ta priorisa loke lo segura e proximo eleccion en bes di loke lo beneficia Aruba a largo plaso. Consecuentemente, nos gobierno a bira mas reactivo cu proactivo, constantemente pagando candela en bes di construi un futuro sostenibel. E enfoque miope aki ta evidente den tur sector, for di economia te na servicionan social, unda solucionnan rapido ta wordo scogi riba solucionnan comprensivo y strategico.

Gobernacion enfoca riba apariencia, no mehoracion

E lidernan di Aruba a bira mas preocupa cu mantene apariencia cu haci mehoracion real y duradero. Como resultado, e spectrum social di nos isla ta desenredando, cu desigualdad creciente y poblacionnan vulnerabel cada bes mas kedando sin e apoyo cu nan mester. A pesar di afirmacionnan frecuente di compromiso na sostenibilidad, nos lidernan a haci poco pa proteha recursonan natural of prepara p'e impactonan di cambio climatico. E asuntonan critico aki ta wordo grandemente ignora te ora nan yega na un punto di crisis, na cual momento e respuesta hopi biaha ta mucho poco, mucho laat.

Servicionan esencial hopi biaha ta wordo negligisha na favor di proyectonan mas politicamente benta-hoso. Incluso ora mehoracion ta wordo haci, nan ta tipicamente superficial, dirigi na muestra resultadonan inmediato en bes di atende necesidadnan a largo plaso.

Aruba na un crusada:

Awe, Aruba ta haya su mes na un crusada critico. E fayonan di gobernacion populista a laga nos cu un economia cu ta instabil, un sociedad cu ta cada bes mas desigual, y un medio ambiente bou menasa severo. E condicion actual di e isla ta refleha directamente añanan di prioridadnan robes y e triunfo di mentalidad populista riba gobernacion sano.

Nos lidernan a faya consistentemente pa atende e problemanan structural cu ta stroba nos. En bes di pone e fundeshi pa un futuro prospero, nan a participa den teatronan politico cu ta ofrece poco mas cu alivio temporal. Esaki a laga Aruba vulnerabel, cu un ciudadania cu ta perdiendo fe rapidamente den e capacidad di gobierno pa entrega cambio significativo.

Responsabilidad y liderazgo responsabel

Ta tempo pa Aruba rechasa e mentalidad populista cu a hiba nos n'e punto precario aki. Nos lidernan mester wordo teni responsabel pa nan fayonan, y un enfoque nobo na gobernacion ta urgentemente necesario—un cu ta enfatisa planificacion a largo plaso, diversificacion economico, y equidad social. E futuro di nos isla ta depende di aleha for di e promesanan bashi di populismo y move den direccion di un liderazgo responsabel y visionario cu genuinamente ta sirbi e interesnan di tur Arubiano.

E caminda padilanti ta exige curashi, integridad, y un compromiso na progreso real. Door di brasa e balornan aki, Aruba por supera e retonan cu e ta enfrenta y construi un futuro cu ta sostenibel, prospero, y husto.



SEPTEMBER 20 TO 29

SCAN FOR MORE INFO

funstacle MASTERS

Join the Caribbean's most exciting **obstacle course** event since 2013!
At **Funstacle Masters**, you can either master the fun or the obstacles.

This year's profits will be donated to **Mon Plaisir Basisschool!**

EVENT DETAILS

Price: AWG 25 per person (team of 4)
Date: September 20 to 29, 2024
Location: Harbour Arena

Digicel
Official Sponsor

MON PLAISIR SCHOOL

REGISTER TODAY AT
WWW.FUNSTACLEMASTERS.COM



Mirrors Beauty Academy ta ofrece e siguiente servicionan

Laba
Corta
Blowdry
Keratina
Cold Wax

Tinja
Highlights / Mechitas
Ombre / Californiana
Bayalage
Peinado

Makeup
Threading
Barberia
Manicure
Pedicure

Y
mucho
mas!

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

Aliansa di hospitalnan den Caribe Hulandes:

Cooperacion strategico of solamente un plataforma di discusion?

NA februari 2021, Aruba, Corsou, Sint Maarten y Hulanda (representando e islanan BES) a dicidi di forma e Dutch Caribbean Hospital Alliance (DCHA), un cooperacion cu mester uni e hospitalnan den e regionnan aki. E aliansa a wordo estableci cu metanan ambicioso: pa medio di colaboracion, e hospitalnan participante kier desaroya plannan strategico pa futuro, realisa beneficionan di escala den compra, educacion y diversificacion di cuidu, y asina garantisar e calidad di cuidu mientras e costonan creciente ta wordo manteni bou di control. Sinembargo, mirando e retonan considerabel cu e hospitalnan na Corsou y Aruba ta enfrenta, preguntanan serio ta surgi tocante e factibilidad y efectividad di e iniciativa aki.

Problemanan financiero y scarsedad di personal

E hospitalnan na Corsou y Aruba ta luchando cu problemanan financiero grandi. Curaçao Medical Center (CMC) ta den un situacion particularmente precario, cu un scarsedad cronico di fondonan financiero y un saldo hopi negativo. Sin medidanan drastico, e sector di cuidu na Corsou ta core riesgo di colapsa, loke por tin consecuencianan grave p'e salud publico. Aunke Horacio Oduber Hospital (HOH) na Aruba ta den un situacion menos urgente, e presion financiero ta notabel aki tambe.

Banda di e problemanan financiero, e hospitalnan tin di haber cu un scarsedad serio di personal cualifica. E problema aki ta specialmente agudo na Corsou y Aruba, unda e diferencianan den condicionnan laboral compara cu Hulanda ta haci dificil pa atrae y retene suficiente personal cualifica. E salario y beneficionan secundario n'e islanan hopi biaha ta menos atractivo cu na Hulanda, loke ta conduci na un fluho di salida di personal medico y un scarsedad di specialistan. E scarsedad aki tin consecuencianan directo p'e calidad di cuidu y e capacidad operacional di e hospitalnan.

DCHA: Cooperacion strategico of solamente un plataforma di discusion?

E DCHA a wordo funda cu e intencion di enfrenta e retonan aki hunto. Pa medio di compra conhunto, e hospitalnan lo por probecha di beneficionan di escala, mientras colaboracion den e area di educacion y diversificacion di cuidu mester percursa pa un oferta di cuidu mas amplio y eficiente den region. Den teoria, e colaboracion aki por conduci na reduccion di gasto y mehoracion di e calidad di cuidu.

Sinembargo, e pregunta ta keda si e DCHA por cumpli cu e ambicionnan aki. E problemanan financiero structural, retonan logistico y e scarsedad di personal cualifica ta rekeri mas cu solamente colaboracion pa wordo resolvi. Sin financiamiento adecua y un plan concreto pa atende e scarsedad di personal, e riesgo ta existi cu e DCHA lo no ta mas cu un plataforma di discusion unda hospitalnan ta papia di strategianan sin cu resultadonan tangibel ta wordo logra.

Aunke e Dutch Caribbean Hospital Alliance a wordo estableci cu metanan prometedora, e pregunta ta keda si e cooperacion aki lo ta capaz di logra e resultadonan desea. E retonan considerabel den e area di financiamiento, logistica y personal por stroba e DCHA den realisacion di su metanan. E peligro ta existi cu e colaboracion aki no ta bay mas leu cu discusion di strategianan, sin cu mehoracion concreto den e accesibilidad di cuidu riba e islanan ta wordo implementa. Solamente tempo lo muestra si e DCHA ta ofrece un solucion real p'e problemanan di cuidu den e region, of si e iniciativa ta resulta di ta un otro 'luchtkasteel' sin resultadonan concreto realisa.



Minister Geoffrey Wever ta anuncia: **Inversion cuantioso den proyecto di Revitalisacion San Nicolas**

DEN un conferencia di prensa dialuna, 2 di september, Minister Geoffrey Wever, hunto cu Minister Ursell Arends, a anuncia cu pronto lo desvela e proyecto di Revitalisacion di San Nicolas. Durante e ultimo lunanan, e Ministerio di Asuntonan Economico, den consulta cu varios stakeholders, a traha un plan pa revitalisa e area di San Nicolas central. Despues di finalmente a ricibi aprobacion di e consejo di Minister pa aloca fondonan adicional, e proyecto aki ta cla pa wordo ehecuta, y lo inicia cu un destaho publico na comienso di october.

Na aña 2022, durante e prome lunanan di gobernacion, a organisa un YES Summit caminda diferente stakeholders y miembronan di e comunidad di San Nicolas a ser invita pa dialoga riba temanan crucial pa desaroyo di e area. Basa riba e feedback ricibi durante e YES Summit, e Ministerio di Asuntonan Economico a desaroya un plan holistico pa e revitalisacion di San Nicolas, den diferente fase.

E vision grandioso pa e proyecto ta eventualmente conecta e centro di San Nicolas cu lama. Un di e sugerencianan ricibi durante e YES Summit tabata pa crea un connexion entre e mainstreet di San Nicolas pariba y e mainstreet pabou, cu actualmente ta wordo trata como dos area separa.

Fase 1 di e Proyecto di Revitalisacion di San Nicolas lo inclui e creacion di un Sunrise Market den e parkeerplaats actual di Arubus, mantencion y modernisacion di e terminal di bus, ampliacion di e espacio publico pa peaton, y e desaroyo di espacio publico cu posibilidad pa precario, pa asina por crea espacio pa terras y actividad di horeca. Tambe lo tin mas iluminacion, matanan, y infraestructura cu ta atractivo pa bishitantenan.

E proyecto ta un inversion significant di mas di 4.3 milyon Florin di parti di gobierno di Aruba. Esaki lo wordo ehecuta den colaboracion cu e Ministerio di Transporte y Naturalesa, bou cual e tereno di Arubus ta inclui. E creacion di e Sunrise Market ta representa un oportunidad hopi bon pa agricultor y artesanonan, pasobra lo tin suficiente espacio pa ofrece mercado pa productonan local, algo cu hopi tempo a wordo desea y ta necesario pa diversifica e atraccionnan di San Nicolas, no solamente pa turista, pero tambe pa localnan cu por disfruta di e area regularmente. Aki e plan ta no solamente pa trece bida nobo na San Nicolas, sino tambe pa crea un experiencia unico pa tanto turistanan como localnan. Proximo siman lo tin e desvelo oficial di e proyecto.



EXECUTORIALE VERKOOP

Ten overstaan van notaris mr. Chamila Agnella Tromp of haar waarnemer zal op **vrijdag 6 september 2024 om 10:00 uur 's-morgens in het Auditorium van de Kamer van Koophandel te Aruba** aan de J.E. Irausquin Boulevard 10, Oranjestad, Aruba, in één zitting bij opbod en afslag in het openbaar worden verkocht, ex artikel 3:268 van het Burgerlijk Wetboek van Aruba:

1. Een woonhuis plaatselijk bekend als

WAYACA 365

staande op een perceel eigendomsgrond ter grootte van ongeveer zevenhonderd zeven en twintig vierkante meter ($\pm 727 \text{ m}^2$), gelegen te Wayaca in Aruba, welk perceel afkomstig is van het moederperceel kadastraal bekend als Eerste Afdeling Sectie T nummer 40, thans bekend met index nummer D4276.

Inzetprijs: Afl. 1.130.000,00

2. Een woonhuis plaatselijk bekend als

HOOIBERG 17-A

staande op het recht van erfpacht tot 18 januari 2053 op een perceel domeingrond ter grootte van 832 m^2 , gelegen te Hooiberg in Aruba, kadastraal bekend als Eerste Afdeling Sectie R nummer 1401

Inzetprijs: Afl. 672.780,00

Iedereieder is gehouden, zowel bij het uitbrengen van een onderhands bod als op de veiling zelf, zich te legitimeren met een geldig paspoort of ID en middels een bereidheidsverklaring, een bankgarantie of andere vorm van zekerheid aan te tonen aan de Executant in staat te zijn tot nakoming van zijn bod en de bijkomende kosten.

De Executant behoudt zich het recht voor de executieveiling uit te stellen dan wel op te houden zonder daarvoor de reden te noemen.

Op de veiling zijn van toepassing de Algemene Veilingvoorwaarden voor Executieveilingen (AVVE) en de Bijzondere Veilingvoorwaarden zoals vastgesteld door notaris mr. Chamila Agnella Tromp.

Voor vragen of meer informatie kunt u een email sturen naar auction@newleafaruba.com of de volgende website bezoeken:

www.newleafaruba.com

CULTURA Y HISTORIA

Aruba: Nos Rikesa

AWEMAINTA ta presenta mas di nos palabranan di antes:

Agterstef

Parti patras di un boto.

Amonestacion

Publicacion cu un pastoor ta haci den misa di e nomber di hendenan cu ta bay casa.

Awa di aña

E prome awanan cu ta cay na cuminsamento di temporada grandi di awasero. Hendenan ta papia di awa di October, di e prome awa di aña. Ta trata di bon awasero. E cunucunan ta bon muha y tur hende ta cuminsa planta.

Baliña

Casca di bonchi, un baliñ'i bonchi. Tambe: Un saco di cuero den cua ta warda un cuchiu.

Balumbra

Den balumbra di awa. Ora bo por cuminsa

wak algo den awa di lama cu no a yega superficie ainda.

Por ehempel bo a mata un pisca, bo ta cuminsa wak algo den e awa pero bo no ta wak e pisca ainda. Hendenan ta papia tambe di balun.

Caburi

Cangreu tin un parti di curpa habri, bou di curpa, unda ta haya webo. Anto e ta rondia lama y den lama e ta bay laba caburi, laba e webonan. Tambe yama cabutiti.

Cabuy'i pisca

Un repi di un mata cu piscanan chikito pasa na dje. M'a cumpra un cabuy'i pisca.

Gogoti

E tapushi di maishi cu e spruit di e pal'i maishi ta produci. E ta bin tapushi chikito y stijf. Awo e maishi ta na gogoti.

Gogoy

Tambe gogoyo. Ora e tapushi ta den su blachinan ainda, prome cu e sali.

Hala cakiña

Na Hulandes: lijntrekken.

Den realidad: hala e cakiña bon.

Hala hende

Un curioso ta hala hende cu tin dolor di pia, di brasa y di lomba.

Mansawapo

Un sorto di preparacion di yerba cu ta uza pa tene e homber na cas.

Mansebo

Un tipo boca grandi. Pa broma so. Tambe: un yoncuman.

Organs

Tela. Tela fini colo geel.

Orno

Ta pone un sombre di cabana traha na un orno pa e haya forma.

E orno ta traha di un pida di troncon di palo di mas o menos un pia halto.



COMFORT, FOOD AND COCKTAILS





FOR SHOWTIMES AND ONLINE TICKETING:
WWW.CARIBBEANCINEMAS.COM

787-999-3292

@caribbeancinemasaruba

Caribbean Cinemas Aruba

DOWNLOAD OUR APP



MADBOR Consultancy

Documento Comercial y Support

- Oferta / Presentacion
- Programa di rekisitonan
- Citacion
- Informacion
- Contrato (*den concepto*)

Operacion

- Analisis di Proceso
- Descripcion di Proceso
- Descripcion di Protocol

Apoyo Empresarial

- Mediacion
- Consulencia/ Consejo
- Comercialisacion

Documentacion oficial (di e empresa) :

- Prepara
- Verifica
- Traduccion-4 idioma:
(*Ingles, Hulandes, Spaño, Papiamento*)

Priva

- Scirbi carta (oficial) - 4 idioma
- Traha Curriculum Vitae
- Carta di solicitud
- Mediacion serca instancianan - 4 idioma

Ban 
Papia
+297-7456724

Turning **Ideas** into Breakthrough **Solutions**

Dañando infraestructura y heridando residentenan

Atake di misil Ruso a sacudi Kyiv



DIALUNA tempran, un serie di explosionnan fuerte a sacudi Kyiv mientras Rusia a lansa un atake di misil significante riba e capital di Ucrania, causando daño na casnan, infraestructura, y heridando tres persona, segun oficialnan a reporta. E atakenan aki a bin apenas un siman despues di e atake aereo mas grandi di Rusia desde e comienso di e guerra total na 2022.

Residentenan den henter Kyiv a wordo lanta door di e zonido di misilnan wordo intercepta pa e sistemanan di defensa aereo di Ucrania. E Forsa Aereo Ucrainiano a reporta cu el a destrui exitosamente 22 di 35 misilnan entrante y 20 di 23 dronnan di atake, cu a inclui varios tipo di misilnan crucero

y balistico. Sirenanan di alarma aereo a zona den henter e pais pa casi dos ora prome cu e shelo a wordo declara cla pa 6:30 a.m. ora local.

E atake, cu a coincide cu e prome dia di scol pa hopi mucha Ucrainiano, a causa interrupcionnan significante. Den e distrito di Svyatoshynskyi, un cas di boiler na un planta di awa a wordo parcialmente dañá, y e entrada di un stacion di metro, tambe uza como un refugio di bom, a wordo alcanza. A pesar di e daño, e stacion di metro a sigui opera. Autonan a wordo cendi na candela, y restonan di misilnan destrui a yobe abou den varios districtonan, incluyendo Solomyanskyi y Holosiivskyi, unda servicionan di emergencia a wordo desplega rapidamente.

Entre esnan afecta tabata Yevheniia, un mama di 33 año, kende, a pesar di e circunstancianan teribel, a hiba su yiu muhe di 6 año, Margo, na su prome dia di scol. “Su mannan tabata tembla...pero nos ainda mester bay scol, no? Nos ta Ucrainianonan,” el a bisa, reflehando e resiliencia di hopi residente di Kyiv.

Ademas di areanan residencial, un edificio no-residencial den e distrito di Shevchenkivskyi y un centro Islamico tambe a wordo severamente dañá. Lider Tatar di Crimea, Refat Chubarov, a confirma e daño na e centro Islamico via Telegram.

E atake aki ta sigui e asalto masivo di dialuna pasa, unda mas di 200 misil y dronenan a wordo lansa den henter Ucrania, matando shete persona y afectando facilidatnan di energia den henter e nacion. Moscu ta sigui nenga di ta target civilnan, a pesar di e destruccion continuo y perdida di bida den e conflicto di 30 luna largo.

Stimami. Sterilisami.

REGISTRA AWO

Y BENEFICIA DI NOS SUBSIDIO CU TA CUBRI TE CU 45% DI E COSTO DI STERILISACION DI BO MASCOTA Y UN MICROCHIP GRATIS!

PA MAS INFORMACION BISHITA: WWW.STIMAMISTERILISAMI.COM

China ta urgi Union Europeo pa adopta un posicion ‘obhetivo y husto’

Den disputa di lama sur di China



CHINA a pidi Union Europeo pa acerca e asunto di Lama Sur di China cu “obhetividad y husticia,” despues di e critica recien di e bloke riba e accionnan di China den e region. E reaccion aki ta bin despues di un incidente di fin di siman envolviendo barconan di warda costa di China y Filipinas, cu a aumenta tensionnan den e awanan disputa.

E mision Chines na Union Europeo a expresa “insatisfaccion fuerte” cu loke nan a yama e “acusacionnan” di Union Europeo tocante e conflicto maritimo. Den un declaracion, Beijing a enfatisa cu Union Europeo, como un partido no-envolvi den e disputa di Lama Sur di China, no tin base legitimo pa “señala dede” tocante e situacion.

E declaracion a critica mas aleu e enfoke repetitivo di Union Europeo riba libertad di nabegacion, argumentando cu e accionnan aki no ta beneficia e interesnan propio di e bloke ni ta aumenta su credibilidad internacional.

E intercambio diplomatico aki ta sigui un colision recien cerca di e Sabina Shoal, marcando e di cinco confrontacion maritimo entre China y Filipinas den un luna. Ambos nacion

a wordo envolvi den un disputa di hopi tempo riba e Lama Sur di China strategicamente vital, cu ambos banda ta acusa otro di provocacionnan delibera.

Como reaccion na e incidente, e Servicio di Accion Externo di Union Europeo a emiti un declaracion diadomingo, condenando loke el a describi como “accionnan peligroso” door di barconan di warda costera Chines contra operacionnan maritimo legitimo di Filipinas. Union Europeo a expresa preocupacion cu e incidentenan aki ta pone na peliger e seguridad di bida riba lama y ta viola e derechonan internacionalmente reconoci pa libertad di nabegacion y sobrevuelo.

Un vocero di Union Europeo a reitera dialuna cu e bloke tin un interes significante den mantene paz y seguridad den Asia, notando cu un porcion considerabel di e comercio exterior di Union Europeo ta pasa door di e Lama Sur di China. E vocero a pidi pa baha tensionnan den e region y a afirma e compromiso di Union Europeo pa apoya su partnernan den eherce nan derechonan legitimo, tanto regional como globalmente.

Memey di preocupacionnan riba e desaceleracion economico di Merca

EUR/USD ta subi un poco



E par EUR/USD a muestra un recuperacion leve dialuna, comerciando rond di 1.1060, mientras inversionistanan ta lucha cu dudanan continuo tocante e solidez di economia Mericano. Preocupacionnan persistente cu e Reserva Federal (Fed) lo por wordo forsa pa implementa bahadanan di tasa di interes grandi na su reunion di september ta pisando riba e Dollar Mericano (USD) y apoyando e Euro (EUR).

Inversionistanan ta aumentando nan expectativa di e posibilidad di un reduccion di tasa di interes grandi di 0.50% door di Fed, cu e chensnan di un “mega cut” awor ta para na mas di 30%, segun e CME FedWatch Tool. E expectativa aki, hunto cu un reduccion di 0.25%, a crea un obstaculo pa e Greenback, ya cu tasanen di interes mas abou generalmente ta disminui e atractivo di e moneda pa inversionistanan stranhero, hibando na reduccion den entrada di capital.

Datonan di inflacion Mericano di siman pasa a duna señalnan mixto, cu e Indice di Prijs di Gastonan Personal (PCE) a keda stabiel na 2.5% na juli y core PCE na 2.6%. Mientras e cifranan aki a baha un poco e preocupacionnan di un aterisahe duro pa economia Mericano, incertidumbre ta permanece. Inversionistanan awor ta observando di cerca e proximo informe di Nonfarm Payrolls, cu lo wordo publica diabierna, cu lo ta crucial pa forma expectativanan pa e siguiente accion di Fed.

Na contraste, e Euro a haya un poco apoyo despues cu datonan di inflacion di Eurozona a cumpli cu expectativanan di economistanan, a pesar di volatilidad anterior. Datonan di inflacion di Alemania y Spaña inicialmente a sugeri un caida mas grandi cu spera, spark preocupacionnan tocante futuro cortamento di tasa di Banco Central Europeo (ECB).

Sinembargo, ora datonan di henter Eurozona a wordo publica, mustrandó inflacion general na 2.2% y inflacion core na 2.8%, e Euro a recupera tereno.

E ECB ta spera di mantene un enfoque cauteloso pa reduci tasanen di interes, particularmente cu crecemento di salario den Eurozona ta keda fuerte. Miembro di Hunta Ehecutivo di ECB, Philip Lane, recientemente a nota cu salarionan probablemente lo sigui aumenta den 2024, agregando presion pa ariba riba inflacion. Esaki ta sugeri cu ECB lo keda depende di datos y cauteloso, cu por brinda mas apoyo pa e Euro a corto plazo.

Tecnicamente, EUR/USD ta keda den un tendencia descendente a corto plaso, cu e par ta forma topnan mas abou desde cu a yega su punto maximo na 1.1202 na final di augustus. Un kibramento bou di 1.1040 por señala mas caida, mientras un ceramento riba 1.1100 por desafia e perspectiva bahista actual.

Memey di cambio den mercado laboral

Hobennan Chines ta enfrenta desempleo creciente



MIENTRAS e panorama economico di China ta pasando den un cambio drastico, e graduadonan hoben di e nacion ta enfrentando retonan sin precedente den obtene empleo. Cu un record di 11.79 miyon graduado di universidad e aña aki, scarsedad di trabou a bira un realidad cruel, empeora pa retironan di trabou den sectornan tradicionalmente considera stabiel.

Un ehempel notabel ta He Ajun, un ex-educador di 32 aña di Guangzhou, kende a wordo forsa pa reinventa su mes despues di e represion di China riba tutoría priva aña pasa. Awor un influencer di desempleo, He ta comparti su trayectoria door di desempleo a largo plaso cu mas di 8,400 siguido riba medionan social. Ganando rond di 5,000 yuan (\$700) mensualmente door di varios actividad freelance, e ta aboga pa freelancing como un habilidad crucial den un mercado laboral cada bes mas incierto.

E gobierno di China a priorisa e desaroyo di “forsa productivo nobo,” enfocando riba areanan niche manera inteligencia artificial y robotica. Sin embargo, e enfasis aki a laga inadvertidamente hopi hoben altamente educa luchando pa haya empleo den otro sectornan. Cu desempleo hubenil urbano alcansando un asombroso 21.3% aña pasa, y e

gobierno consecuentemente deteniendo e publicacion di tal datonan, e situacion ta parece sombrío pa miyones di graduado buscando trabou.

E economia gig, un biaha un refugio pa e desempleadonan, awor tambe ta mustando señalnan di sobresaturacion. Ciudadnan den henter China a raporta un exceso di chauffeurnan di ride-hailing, mientras cu hasta trabounan di gobierno, un biaha considera sigur, ta wordo reduci. Redundancia den empleo estatal a agrega na e tristesa, cu provincianan manera Shandong y Henan cortando miles di posicion den añanan recién.

Mientras mercadonan laboral tradicional ta contrae, hopi hoben Chines ta acudiendo na medionan social pa comparti strategianan di sobrevivencia. E visibilidad creciente di desempleo riba plataformanan manera Xiaohongshu a yuda reduci e stigma asocia cu desempleo, ofreciendo un sentido di comunidad n’esnan cu ta luchando.

Influencers manera He Ajun ta sugeri cu, den e temponan difícil aki, hobennan mester baha nan expectativanan y explora camindanan creativo, manera bende artesanía traha na man of utiliza medionan social pa genera entrada.

DEPORTE

deporte@awemainta.com

Despues di a haya un tiro den intento di atraco

Ricky Pearsall a sali for di hospital



SAN Francisco 49ers wide receiver, Ricky Pearsall, a sali for di hospital despues di a sufri un herida di bala durante un intento di atraco na San Francisco diasabra. E nobato di 23 aña, cu a wordo selecta den e prome rond di e NFL Draft 2024, awor ta recuperando na cas.

E incidente a tuma luga den e area di Union Square den centro di San Francisco, unda polis a reporta cu Pearsall a wordo acerca pa un sospechoso di 17 aña cu a intenta un atraco arma. Durante e lucha cu a sigui, e arma di candela di e sospechoso a los un tiro, heridando tanto Pearsall como e sospechoso. Autoridadnan a responde rapidamente na e escena, deteniendo e sospechoso y recuperando e arma uza den e atake.

Inicialmente, Pearsall tabata den condicion serio pero stabiel, e bala a drenta su pecho y sali via su lomba sin daña ningun organo vital. Su mama, Erin Pearsall, a expresa su alivio riba medionan social, bisando, “E tin hopi suerte; DIOS a proteh’e. Mi yiu a wordo gespaar awe pa gracia di DIOS.”

Alcalde di San Francisco, London Breed, y Hefe di Polis Bill

Scott, ambos a condena e violencia, cu Breed a remarca cu incidentenan asina ta raro na Union Square. “Nos pensamentonan ta cu Ricky Pearsall y su famia,” Breed a bisa, agregando cu e ta spera di mira e recuperacion di Pearsall y su regreso na e veld. Hefe di Polis Scott a confirma cu e sospechoso, un teenager di Tracy, California, lo enfrenta acusacionnan den corte hubenil.

E organisacion di 49ers a expresa nan apoyo pa Pearsall, cu un declaracion bisando, “Nos pensamiento y oracionnan ta cu Ricky y henter e famia Pearsall.”

Pearsall no a participa den weganan di pre-temporada debi na lesionnan previo na su hamstring y schouder, pero e team y fanaticonan ta keda spera pa su recuperacion completo y eventual regreso na e wega.

E incidente aki a reaviva discusionnan tocante criminalidad na San Francisco, un asunto clave den politica local, cu candidatonan manera Supervisor di Condado Aaron Peskin ta enfatisa posicionnan mas duro riba criminalidad y seguridad publico.



Verstappen ta critica Red Bull

Ta yama e auto un 'Monster Imposible pa Maneha' y ta duda den defensa di su titulo di F1



E campeón di Formula Uno, Max Verstappen, a critica su auto di Red Bull severamente, describiendo e como un “*monster imposible pa maneha*” despues di un resultado decepcionante di seis luga n’e Grand Prix di Italia. E campeón reinante a expresa frustracion profundo, sugeriendo cu a menos cu cambianan significativo wordo haci, tanto su speranza como esun di Red Bull di retene nan titulonnan ta desapareciendo.

Verstappen a lucha durante henter e fin di siman na Monza, sin logra haya velocidad y finalmente terminando tras di Charles Leclerc di Ferrari, kende a tuma e victoria, y Oscar Piastri y Lando Norris di McLaren, kendenan a sigura di dos y di tres luga respectivamente. E di seis luga di Verstappen a permitie solamente gana un posicion for di su posicion di salida di shete luga, mientras su bentaha den e campeonato a baha na 62 punto. McLaren tambe a acerca Red Bull den e clasificacion di constructornan, reduciendo e diferencia na solamente ocho punto.

Den un entrevista sincero despues di e careda, Verstappen no a sconde su decepcion. “*E auto ta imposibel pa maneha, e ta un problema di balans masivo cu nos tin, y esey no ta sola-*

mente riba un buelta sino tambe durante henter e careda,” el a bisa. Reflehando riba e caida dramático den rendimiento, el a lamenta, “*Aña pasa, nos tabatin un auto excelente, probablemente e mas dominante cu nunca, y nos a converti’e den un monster.*”

Despues di un comienso excelente di e temporada cu shete victoria den e prome 10 rondnan, Verstappen awor a pasa seis careda sin un victoria. El a atribui e caida aki na un serie di upgradenan inefectivo cu a permiti rivalnan cera e distancia. E piloto Hulandes a emiti un advertencia severo, insistiendo cu sin cambio urgente, nan aspiracion di titulo lo desaparece. “*No ta importa unda nos ta core n’e momento aki, nos ta malo tur caminda, pues nos mester di hopi cambio,”* el a declara. “*N’e momento aki, ambos campeonato no ta realistico.*”

Mientras tanto, Lando Norris, kende a termina na di tres luga, a urgi McLaren pa priorisa su reto p’e titulo riba su compañero di ekipo Oscar Piastri, despues cu e Australiano a pasa su dilanti den e prome buelta sin ningun ordo di ekipo na vigor.

Den derota contra Liverpool

Bruno Fernandes ta defende Casemiro despues di eror costoso

BRUNO Fernandes a sali na defensa di su compaño di ekipo di Manchester United, Casemiro, despues di e actuacion yena cu erornan di e mediocampista Brasileño den e derota di 2-0 di e team contra Liverpool. E perdida, cu a marca e di dos derota consecutivo di United, a lanta preguntanan tempran tocante e maneho di Erik ten Hag apenas tres wega den e temporada nobo.

Casemiro a haya su mes den centro di critica despues cu su erornan a contribui directamente na ambos gol di Liverpool den e prome mita. E pase robes di e Brasileño y un intento fracasa di dribble den su propio mita a permiti Luiz Diaz di Liverpool capitalisa, marcando su di dos gol di e wega. E fayonan aki a conduci na Casemiro wordo substitui na half-time, un decision cu a hala hopi atencion.

A pesar di e critica, Fernandes, e capitan di United, a urgi pa no culpa Casemiro so pa e derota. Papiando cu Sky Sports, Fernandes a enfatisa e responsabilidad colectivo di e team. *“E golnan semper ta auto-infligi. Bo mester comete un eror pa duna nan e gol. Nos no mester ta mustrando dede riba tur hende. Esey lo no yuda nos awor,”* el a bisa. Fernandes a agrega cu tanto Casemiro como e compaño di ekipo hoben Kobbie Mainoo, kende tambe a lucha, tabata simplemente purbando di ta balente riba e bala, cual ta parti di e wega.

Fernandes tambe a destaca e experiencia di Casemiro, notando cu e ex-estrella di Real Madrid a hunga pa e clubnan top di mundo y ta compronde e halto y bahonan di futbol.



“Casemiro tin mas experiencia cu mi. Mi no mester bise nada; e sa di kico futbol ta trata,” Fernandes a declara.

Manager Erik ten Hag a haci eco di e sentimentonan di Fernandes, expresando confiansa den e capacidad di Casemiro pa recupera. Ten Hag a reconoce e erornan di e mediocampista pero a enfatisa su importancia pa e team, a pesar di e competencia di e firma nobo Manuel Ugarte. *“E ta un gran hungado, y e lo sigui ta crucial pa nos. El a mustra su caracter prome, y mi ta sigur cu e lo haci’e atrobe,”* Ten Hag a afirma.

Mientras Manchester United ta busca pa reagrupa, e atencion ta keda riba Casemiro pa mira con e ta responde na e contratiempo aki tempran den e temporada.

ABCS 9-Ball Challenge na Tanki Leendert den TT BILLIARDS

PA varios aña FEBIAR a organisa e torneo internacional ABC unda hungadonan di Aruba, Bonaire y Curaçao ta bataya fuertemente contra otro. E aña aki cu gran colaboracion di FEBIAR, TT Billiards and Sportsbar ta organisando e torneo aki cu 48 participante.

Pa prome biaha Sint Maarten ta join, y lo tin 2 representante, Bonaire lo t’ey cu 9 hungado, Corsou cu 11 hungado y Aruba tin 26 representante. Diabierna pa 6or di atardi e torneo lo ranca sali den e formato di “double elimination”. Lo continua diasabra pa 12or merdia te ora keda 4 hungado den winners round y 4 hungado den losers round.

Eynan e formato ta cambia pa “single elimination”. Diadomingo lo tin accion henter dia te ora keda e Campeon ABCS 2024. Manera semper e cushina lo ta candela bou maneho di Chef Don Omar.



Un danki special na: FEBIAR, C.M.B., Get Rich Lottery, Cunuco Fresh, Eumar Lock, Complete Solution, Auto Pro Body and Paint.

Eric Ras (CURPA):

Aruba no conoce e futuro briyante priminti pero mas medida y pobreza creciente

GOBIERNO diripiente ta bin bisa cu tur cos ta bon y cu Aruba ta den bon direccion y mester di bo sosten den e proximo eleccion. E pisca ta muri pa su boca. No ta tur cos pueblo mester kere di partidonan tradicional. Nos por corda e slogan e futuro briyante. Pa pueblo no tabata tin nada briyante. No ta tur cos cu ta briya ta oro. Loke si ta briya manera oro t'e 17 puntonan di Desaroyo Sostenibel, pero pueblo mester ta consciente cu esaki ta puro gañamento.

E ta un agenda cu tin mas cu 50 aña bieu. Ora nan bisa bo e enemigo ta sutil bo mester kere. Mundo a wordo indoctrina sutilmente y den ultimo 9 añanan nan ta pusha e agenda aki mundialmente p'asina na 2030 yega n'e gobierno global. E lobonan aki ta penetra den tur sistema p'asina nan logra nan meta. E cambionan den educacion y nos leyman ta hiba nos na implementacion di agenda 2030.

Nos gobiernonan for di 2001 te cu den 2024 no a keda atras. Ora bo mira e desastre financiero cu nos gobiernonan a hinca nos aden anto nos por compronde cu gobiernonan ta cumpli cu World Economic Forum cu ta bisa lo bo no tin nada y lo bo ta feliz. Gobierno ta cabando cu clase media y lo keda e rico y e poberman. Esaki t'e Sustainable Development Goals nos gobiernonan a firma p'e. Si pueblo mira bon esaki tambe ta hinca den landspakket. Nos por a mira cu e ROPV (plan di desaroyo, smart city) tambe ta segun e Sustainable Development Goals. E cabuya ta rond di nek di nos tur y poco poco gobierno ta hale cera sin cu pueblo ta paga tino.

September t'e luna cu nos lo mira Parlamento y Bestuurskantor dorna cu e 17 puntonan di Sustainable Development Goals. Partido AVP ta gaba cu su slogan "bon comun" cu ta mesun plan comunista di Sustainable Development Goals.

Locual cu minister di Labor, Energia Integracion ta haci ta implementacion di e agenda aki p'asina tin mas stranhero cu yiu di tera den e area laboral. Segun por a compronde cu e minister tin mas di 11 mil permiso firma caba pa stranhero traha riba nos Isla. Esaki t'e meta pa destabilisa nos Isla y asina Aruba perde su identidad. Nos yiunan di tera lo no regresa na Isla pavia nan lo no haya trabao y no tin vivienda. Nos no ta contra di stranhero alcontrario nos tin hopi stranhero cu a contribui na adelanto di nos pais. Aruba a bira un mercado liber caminda stranhero ta cumpra cas y converti

nan den Airbnb. Prijs di cas y tereno ta asina halto cu ta bira impagabel pa yiu di tera. Nos kier nos isla den man di stranhero of den man di nos yiunan di tera. Nos tin un lucha pa conserva nos cultura.

Awor diripiente nos por mira cu e presupuesto a wordo entrega na tempo y jaarrekeningnan tambe a wordo entrega. Campaña ta den full swing. Asina aki e lobonan bisti na carne lo presenta nan programa di gobernacion pa pidi pueblo nan confiansa pa sigui goberna. Laga nos pidi Dios sabiduria y inteligencia pa nos por tuma nos miho decision. E decision aki ta hopi importante p'e añanan nos dilanti. Gobiernonan cu a firma e acuerdo di Sustainable Development Goals a cuminsa cay den otro y huicio di Dios lo baha riba nos gobiernonan. E sentencia por tarda pero lo yega sigur.

E Sustainable Development Goals ta contra di e bienestar di e famia institui pa Dios y ta contra di nos yiunan. Partido Curpa t'e unico alternativa.

APPAREL

BOAT ACCESSORIES

TODOMAR

f TodomarAruba @TodomarAruba TodomarAruba +297 585 0555

FISHING TACKLE

FIBERGLASS PRODUCTS

Leonardo Figaroa:

PDP lo sostiene solamente un vak-minister pa finansa publico

Pa nos esaki ta non-negotiable!

E reto mas grandi awe ta cu nos tin un gobi-erno di coalicion unda a mayoria ta minis-ternan di MEP. RAIZ cu su 2 ministernan den consejo di minister no tin poder pa influencia maneho y pone presion politico unda cu tin mester. Pueblo a vota pa RAIZ cu un speransa cu “nos lo no ta nan”, pero awe nos por wak con e tirania di mayoria sosteni pa RAIZ ta causando un maneho financiero desastroso p’e siguiente generacion, un pobreza structural cu cada biaha ta keda aumenta y asina tin hopi otro retonan mas cu e pais ta enfrenta.

*E ta importante pa remarca cu partido RAIZ ta manehando **no** mas cu 6% di full e presupuesto di pais Aruba (mira consejo LIM 2022, Rva 115-21), na varios ocasion tin dos reto grandi:*

- Un di nan ta cu no tin continuidad debi cu cada gobierno ta cambia e ley cu ta regla e responsabilidad ministerial esaki ta percura cu e ta costa mas fondo pa Aruba y e pagado di impuesto.
- Nos tin un gobierno demasiado grandi, Consejera General a indica na 2022 (RvA 115-21) caba den su consejo cu Aruba mester un gobierno chikito cu lo por percura pa ta mas eficaz na momento di por tuma decisionnan importante p’e pais.

Un vak-minister, Kico esaki ta?

Den Aruba su historia masha poco nos a yega conoce un vak minister, durante e gobierno di Sr. Mike Eman, Sr. Angel Bermudez a keda nombra y apunta como ministro di finansa, den mi opinion un di e miho ministernan cu nos a logra haya riba e tereno financiero. Awe hopi di e eficiencia di e departamento di impuesto ta danki na e fundeshi solido di su maneho cu e la implementa.

Nos por wak un biaha mas cu riba e tereno financiero ainda nos no tin un maneho financiero solido y duradero.

1. Minister di Finansa no ta entrega e cuenta anual cada 30 di augustus segun



ordenansa di comptabilidad.

2. Tin presupuesto cu surplus, pero unda e fondo aki ta bay?
3. Dicon gobierno di Aruba mester **a presta \$160 miyon** riba mercado internacional?

Pa PDP esaki ta preguntanan importante, paso awe danki na e maneho desastroso y irresponsabel di AVP & MEP cu durante decadanan nan a hiba, e hoben y baby cu nace awe tin un obligacion cu su pais balora na 56 mil florin, pa nos esaki ta inaceptabel.

Nos proposicion

Na un ocasion anterior nos a informa pueblo cu pa nos partido enfasis riba finansa publico ta crucial, no solamente nos mester introduci un maneho financiero mas sostenibel y duradero, pero mester cuminsa implementa e reforma y medidanan cu pa decadanan politica a negligisha. **Nos punto di salida ta un maneho financiero duradero p’e futuro generacion.** Nos vision ta pa por tin un sistema di finansa publico unda Aruba no mester presta riba mercado internacional na tasa di interes halto pa cubri tur su gastonan, pero cu nos mes riba propio forza por demostra di maneha nos finansa publico.

Segun consejo di Raad van Advies 25 april 2024 tin algun cambio den ley y maneho cu mester keda introduci y nos ta sostiene

tur esakinan.

Algun di nan ta por ehempel:

1. Minister di Finansa mester ta un cartera so y no por ta responsabel pa un otro cartera. Ta importante pa menciona cu e ordenansa di comptabilidad ta duna e minister aki autoridadnan cu ta percura cu e responsabilidad aki ta uno mucho mas grandi di locual pais Aruba tin mester un minister cu mas responsabilidad. Minister di Finansa ta carga responsabilidad p’e maneho financiero economico di pais.
2. Segundo minister di Finansa ta responsabel pa representa pais Aruba como accionista den varios compania semi-publico of Nv’s, e aspecto di maneho tin cu wordo regla door di e minister en cuestion. Den varios caso tin traspaso di mandato pa un otro minister encarga cu e responsabilidad di maneho. Nos vision ta cu e minister di finansa no necesariamente cada biaha master traspasa e aspecto di mandato na un otro minister.
3. Mester desaroya un maneho di participacion general, cu tambe ta responsabilidad di Minister di finansa.

Nos ta existi di e siguiente coalicion pa tin un minister di finansa cu ta mas miho ekipa pa por hiba un financiero di pais Aruba mas duradero y eficiente. E vision di PDP ta pa nos por haya sosten di bo como votado pa por forma parti di e siguiente coalicion pa di tal forma por negocia y pidi e cartera di minister di finansa pa asina nos por propone un nomber di un persona studia, cu experiencia necesario y sin miedo pa perde voto pa por implementa e reforma cu nos pais tin mester. Ehecuta e reforma di e landspakket y tur e protocolnan cu Gabinete Wever Croes a firma di 2018 te cu awo, traha mas lihe y eficiente pa implementa tur e preparacion di e Rijkswet pa mas supervision financiero. Mas pronto nos implementa e reforma akinan mas lihe nos por trece alivio financiero den cada hogar.

Entrega oficial di parti di Wings of Hope di AAA

Scol Graf von Zinzendorf a ricibi 6 smartboard



E team di Wings of Hope (WoH) na Aruba Airport Authority N.V. (AAA) ta masha orguyoso di por a regala Graf von Zinzendorf School (GVZ) un total di seis smartboard riba diahuebs 29 di augustus 2024.

Wings of Hope (WoH) di AAA ta enfoca pa ehecuta diferente proyecto socialmente responsabel cu e Sustainable Development Goals di Nacionnan Uni como su principio di guia pa asina contribui na bienestar, desarrollo y sostenibilidad di e comunidad di Aruba. WoH di AAA a colabora cu Departamento di Enseñansa Aruba (DEA) pa identifica e scolnan cu tin mester di sosten y a base di e necesidadnan di e scolnan na Aruba, DEA a recomenda GVZ pa ricibi e donacion.



Durante un reunion cu GVZ, WoH a haya sa cu GVZ tabata den proceso pa muda pa un localidad nobo pasobra caminda nan ta actualmente no ta uno sigur pa por cumpli cu e metanan educativo. Maske cu WoH no por yuda pa cu e renobacionnan, parti di e plan di e scol ta pa implementa tecnologia innovativo p'asina mehora nan calidad di educacion y ambiente pa siña (SDG 4).

Den colaboracion cu un proveedo local y dilanti di e alumnonan di klas, docente y e miembronan di WoH, a haci entrega oficial di seis screen smartboard pa e scol. GVZ a expresa nan gratitud door di prepara un cancion, dibuho di Wings of Hope pinta door di e alumnonan mes y a entrega un certificado di aprecio na WoH.

Wings of Hope di AAA ta masha orguyoso di por contribui na un otro scol pa medio di tecnologia innovativo y di e manera aki ofrece e alumnonan un manera moderno y interactivo pa sigui siña. *“Wings of Hope tin como meta pa ehecuta varios proyecto exitoso pa medio di nos plan anual y di e manera aki contribui na diferente SDG. Mirando cara di e studentenan yena cu felicidad y gratitud ta loke ta haci nos mas satisfecho ainda”*, asina Christine Kaarsbaan-Leo, Sustainability & Health Manager, a enfatisa.



Prensa a canta bingo hunto cu Aruba Bank

Celebracion di Dia di Prensa cu dushi ambiente



EN conexion cu dia di Prensa Aruba Bank a organisa un tremendo Music Bingo na Santos Coffee and Soul.

E evento su meta ta pa celebra hunto cu miembronan di prensa, bisa danki y refleha riba e importancia di e rol cu cada un miembro tin den nos comunidad.

Team di maneho y representantenan di mercadeo di Aruba Bank a haya e oportunidad pa conecta cu miembronan di prensa den un seno ameno y disfruta di un ambiente festivo cu a sigura un experiencia memorabel pa tur presente.

Aruba Bank ta orguyoso di por a organisa otro evento pa celebra Dia di Prensa. Nos kier a yama danki na tur esnan presente cu a haci e evento aki uno exitoso.



Un donacion di buki pa mucha di Aruba Bank



NA biblioteca nan ta feliz cu un donacion di buki pa mucha na Papiamento. Aruba Bank a acerca biblioteca cu e gesto pa duna biblioteca mas cu 100 buki. E aña escolar aki mester mas buki na Papiamento pa e muchanan por lesa y fia. Esta, e regalo ta bon bini.

E entrega a tuma luga diabierna atardi cu Roxanne Croes y Francis Croes di Aruba Bank y bibliotecaria Gina Jie Sam Foek. Aruba Bank ta hopi contento di por a haci e donacion di buki na balor di AWG 5000 na Biblioteca. Aruba Bank ta spera di por inspira otro compania of instancianan pa tambe yuda Biblioteca engrandecere su coleccion. Roxanne y Michelle di departamento di Mercadeo cu hopi cariño a bay scoge buki pa biblioteca hubenil su coleccion.

Den e cargo tambe tin buki pa Young Adults y adulto. Un danki grandi na Aruba Bank!

Biblioteca ta ofrece miembresia gratis pa baby, mucha y hoben bou 18 aña. Esaki ta habri un mundo di buki, storia y informacion den diferente forma, tambe Ebooks y audiobooks. Miles di buki ta warda nan! Biblioteca ta ofrece espacio pa studia, siña, topa y reuni, computernan cu Internet y tambe WIFI gratis pa un y tur. Ademas tin espacio pa diferente evento y exposicion. Biblioteca ta habri di dialuna pa diabierna. Pues, 'Ban biblioteca!'



Fundacion Chico Harms un biaha mas cu un Parada Folklore Cultural exitoso



DIADOMINGO 1 di September 2024, den conexion cu dia di Brazil, Fundacion Chico Harms a organisa un biaha mas e famoso Parada Folklore Cultural 2024 den e barrio di Brazil. Un parada cu a conta cu un total di 11 grupo di baile, luciendo trahenan folklore sumamente colorido y bunita.

Durante un entrevista na e parada, Prome Minister Evelyn Wever-Croes, representando Minister di Cultura Xiomara Maduro, a expresa di ta sumamente contento di por ta presente na un evento cultural asina importante, na unda e por admira con Aruba yen di orguyo, ta celebra su cultura. El a indica cu tin varios evento cultural durante aña, pero cu esaki ta esun “original” mes, pasobra bo por wak con e participantenan yen di smaak y zjeito ta bin join e parada pa baila y celebra. Tambe el a indica cu pa su persona, tabata sumamente bunita pa wak e multitud di hende para band’i caminda, ilustrando asina con pueblo en general ta brasa nan cultura.

“Minister Xiomara Maduro tin un dicho ta uza tur ora; Cultura bo tin cu bib’e. Y durante e parada cultural aki mi por a mira berdad con nos Arubianonan ta biba nan cultura. Y no ta solamente esnan den parada, sino tambe e multitud di hende cu ta asisti na banda pa aprecia e cancionnan y trahenan bunita. Mi ta gradici Fundacion Chico Harms pa nan dedicacion y esfuerso den mantene nos cultura bibo, y felicita nan pa un otro evento exitoso na unda comunidad completo ta uni pa celebra Aruba su cultura”, Prome Minister a expresa.



Desblokia e poder di palabra E beneficianan di lesamento

LESAMENTO a keda un parti fundamental di cultura y educacion humano durante siglo. For di 'scroll' bieu te loke t'e buki digital moderno, e actividad di lesa ta keda un herment poderoso pa crecimiento personal, adkiri conocimiento y entretenimento. Pero mas di e placer simpel di un bon storia, lesamento ta ofrece un multitud di beneficio cu por yuda na nos bienestar mental, emocional, y incluso fisico. Den e articulo aki, lo nos explora e diferente bentananan di lesamento y dicon pa keda un parti regular di rutina di tur hende.

Beneficianan cognitivo

Lesamento ta mescos cu un trahado fisico pa bo cerebro. Mescos cu ehercicio ta fortalece e curpa, lesa regularmente ta fortalece e mente. Lesamento ta mehora conectividad di cerebro, amplia bo vocabulario, y ta stimula e capacidad pa rasona. Loke esaki ta nifica ta cu lesamento ta yuda na mantene bo cerebro den un estado optimal di salud, estimulando bo memoria y hunto cu esaki ta yuda preveni perdida di capacidad mental cu tin tendencia di bin cu edad.

Reduccion di stress y mehora di bienestar emocional

N'e mundo di awendia, unda stress ta bira mas comun, lesamento ta ofrece un experiencia bon bini. Suma n'e mundo di un buki por yuda bo mente pa sali for di presionnan di bida di dia pa dia, duna bo un sentido di paz y calma. Un investigacion a indica cu mescos ora bo ta lesa un rato, e ta duna un efecto di relajacion cu ta resulta den un reduccion significativa di nivel di stress. Ademá, hopi hende ta uza lesamento como un forma di escapismo cu por trece alegria y estimulo speranza.

Mehora di conocimiento y perspectiva

Un di e beneficianan mas grandi di lesamento ta e oportunidad pa adkiri conocimiento. Cada bes cu bo lesa, bo ta absorbe nobo informacion cu ta amplia bo base di conocimiento. Di literatura clasico te buki di non-ficcion riba temanan actual, bo ta pone bo mes den contacto cu diferente idea, cultura y historia cu ta contribui na un hende mas cultura y habri bo mente pa bista nobo. Lesamento por cambia manera di wak bida y yuda bo pa desaroya mas empatia y comprension pa otro hende.

Mehora di vocabulario y capacidad di comunicacion

Un gran parti di comunicacion ta depende riba un vocabulario rico. Lesamento regularmente ta expone bo na palabra nobo y frase cu bo no a encontra antes, fortalece bo capacidad di comunica mas efectivamente. Bo ta siña manera di expresa bo mes mas claramente, tanto den skirbi como den



papia. E habilidad pa splica bo pensamiento of sentimento cu claridad ta fundamental pa relacionnan personal y profesional, y un vocabulario amplio por habri porta pa nobo oportunidadnan den bida.

Estimulo di creatividad y imaginacion

Lesamento no ta solamente for di pa gana conocimiento; e ta tuma bo mente riba un biaha den mundo di imaginacion. Ora cu bo ta lesa un buki cu mucha detaye, bo ta crea imagennan visual den bo mente, loke ta stimula bo creatividad. Esaki ta tuma luga mescos na henter edadnan: tanto mucha como hende grandi ta beneficia di e estimulo mental cu e ta duna. Lesamento ta inspira hende pa pensa mas creativamente y pa busca solucion nobo pa problemanan di bida real.

Mehora di atencion y concentracion

Den un mundo satura di tecnologia y distraccion constantemente, lesamento ta ofrece un manera pa desaroya un capacidad di concentracion profundo. Ora cu bo ta lesa, bo ta enfoca riba e texto y e ta rekeri un cierto grado di atencion y pasenshi. Desaroya e habilidad pa lesa sin distraccion ta yuda na hende pa ta mas productivo na otro area di bida, p.e., na trabou, scol, of den tareanan di dia pa dia.

Lesamento como placer y entretenimento

Mas aya di tur e beneficianan intelectual y emocional, lesamento ta un fuente di placer y entretenimento cu ta sin igual. Un buki bon ta laga bo bira sumergi den e historia, creando un sentimento di satisfaccion cu por duna bo alegria mescos ora bo no ta wak otro actividadnan di recreo. Lesamento ta pone bo na contacto cu mundo imaginario cu ta risca e limite di e realidad.

Lesamento ta mas cu solamente un manera pa pasa tempo; e ta un inversion den bo salud mental, desaroyo personal, y bienestar general. Sin importa bo edad of pasatempo favorito, agrega lesamento como un parti fiho di bo rutina ta un decision cu lo trece beneficianan profundo y duradero na bo bida. N'e mundo di awendia, unda tempo y atencion ta ora, lesa ta un regalo cu bo ta duna bo mes, cu lo sigui pa duna fruto ora pa ora.

JCI Senators of Aruba' a host e prome 'Annual Reunion Celebration' di ESSAC na Aruba

E siman di 11 pa 17 di augustus 2024 'JCI Senators of Aruba' tawata anfitrión di un grupo di JCI Senators, kendenan a bini Aruba specialmente pa lanta un organisacion nobo pa Senadornan di habla Ingles, di Canada, Nort America (Merca) y Caribe, y a yama e evento "1st Annual Celebration Reunion".

Junior Chamber International (JCI) ta un organisacion internacional pa hobennan entre e edad di 18 pa 40 aña, cu e meta pa desaroya e habilidad di liderazgo den e individuo aki. Esaki e organisacion ta haci door di duna e hobennan, training den diferente ramo manera: procedura parlamentario, con pa planea un proyecto, budgetering (traha presupuesto), presentacion den publico, presentacion di proyecto, protocol y etiquette di mesa, etc. Banda di e training e hoben ta haya e oportunidad pa pone den practica loke el a bin ta siña door di traha den proyec-tonan y p'asina cumpli tambe cu e necesidad cu tin den nan comunidad, asumi responsabilidad den directiva, riba nivel local, nacional y internacional. Tambe JCI ta organisa durante un aña diferente actividad caminda e miembronan por bini hunto den un encuentro na un otro pais, asina topa cu miembronan di otro pais, intercambia idea y proyectonan, tuma curso riba nivel nacional y internacional y crea amistad nobo den mundo henter.

JCI conoce tambe un miembro mas den e organisacion cu ta un 'JCI Senator'. Un 'JCI Senator' ta un miembro cu a sobresali den e organisacion ora e tawata un miembro entre 18 pa 40 aña, y JCI Internacional ta dune un reconocimiento pa bida largo, cu ta di bira un 'JCI Senator'.

E Senadornan di area di Americas y Caribe a scoge Aruba pa durante e dianan 15,16 y 17 di Augustus 2024 bini hunto pa lanta un organisacion nobo, cual lo hiba e nomber di 'English Speaking Senators of the Americas and the Caribbean' (ESSAC). E organisacion a keda oficialmente lanta diasabra 17 di Augustus 2024 durante un Asamblea General cu a wordo celebra den La Cabana Ballroom. E directiva pa ESSAC cu a keda eligi ta: Senadora Rudmila Smith-Paulo como Presidente, Tesorero Senador Lawrence Pitmann. Directora Senadora Ariel Jones, Directora Senadora Susan Geddes y Consehero General, Senador Steve Sutherland. E directiva eligi a wordo instala den e Asamblea General na La Cabana Resort Aruba.

E miembronan cu a bishita Aruba a hospeda na 'The Eagle Aruba Resort' y tur tawata nan prome bishita na Aruba. E comite organ- isado a prepara un programa extensivo pa nan, caminda nan a haya e oportunidad di conoce mas di Aruba. A habri e evento cu 'Opening Ceremony Dinner', un tour rond di Aruba di Lighthouse te Baby Beach, un anochi Arubano cu dushi cuminda tipico di



Aruba, baile 'Dabaruida' y musica tipico di 'Flor di Montaña', un sailing tour riba Catamaran, un Asamblea General caminda a eligi un Directiva pa ESSAC y e evento a wordo clausura den ballroom di Aruba Eagle Resort, cu un tremendo cena, show di Carnaval y a baile riba tononan di bon musica di DJ Metropolis henter anochi. Na e ocasion aki a reconoce 3 Arubiano como Miembro Honorario di ESSAC den persona di Vicky do Nascimento, Stanley Dabian y Roderick Hoek.

E Senadornan bishitante a keda masha encanta cu Aruba su beachnan, su hospitalidad y su hendenan amabel y e bon cumin-danan cu nan a ricibi. E comite organizado a ricibi masha hopi palabra di elogio y bon comentario di cada un di e bishitan-tenan. Tin di nan a duna di conoce cu nan lo bolbe bek Aruba cu nan famia. ESSAC y e Comite Organizado por weita atras riba un evento exitoso y den historia ta keda marca cu na Aruba ta caminda e organisacion nobo a nace. E comite organizado ta gradici un y tur cu a coopera pa haci e evento aki uno exitoso y asina a yuda pa Aruba su nomber keda resona positivamente den mundo. Hunto pa excelencia.

Como parti di proyecto di revitalisacion

Creacion di un mercado local na San Nicolas



NA un conferencia di prensa dialuna, 2 di september, Gobierno di Aruba a anuncia e prome fase di e proyecto di Revitalisacion di San Nicolas.

Fase 1 di e proyecto lo inclui e creacion di un mercado local, destina pa sirbi como un atraccion nobo pa bishitantenan y un plataforma vital pa nos agricultor y productor local. E Sunrise Market lo ta situa den e parkeerplaats actual di Arubus, y lo inclui espacio dedica pa no solamente artesanía, pero tambe pa productonan local cu hopi di nan a anhela pa asina nan por vende den un forma mas consistente y accesibel.

Pa hopi tempo, a yega peticion for di comunidad pa haya un espacio cu por promove e mercado local, y cu e proyecto aki, Minister Arends ta muestra e compromiso firme pa atende e necesidad aki. E creacion di e Sunrise Market ta un paso importante den e direccion di diversifica e atraccionnan di

San Nicolas, y brinda un sosten pa e agricultor y productor local cu tanto mester di un plataforma manera e Sunrise Market pa por crece y prospera.

Adicionalmente, e proyecto ta inclui mantencion y “upgrade” necesario na e stacion di bus na San Nicolas, creando un espacio mas atractivo pa peaton y pa turistanan. E Sunrise Market lo no solamente fungi como un atraccion turistico, pero e localnan di e area tambe lo haya beneficio di e disponibilidad mas frecuente di productonan fresco y local, asina estimulando e industria di nos productor local y duna nan un chens mas grandi pa progresa.

Minister Arends ta reitera cu esaki ta un parti crucial di su plan pa sostene y fortalece e comunidad di productornan local. Gobierno di Aruba no solamente ta revitalizando un parti di Aruba sino tambe ta construyendo un futuro unda San Nicolas ta prospera mas aya cu un refinaria.

Den sala di Consejo di Minister

Gobierno di Aruba a celebra dia mundial di prensa hunto cu miembronan di prensa



EN conexion cu Dia Mundial di Prensa cu ta wordo celebra riba 1 di september, Gobierno di Aruba tawatin un encuentro ameno cu prensa di Aruba como aprecio y gradicimento pa e trabou incansabel cu nan ta eherce den nos comunidad.

Ya pa 7 aña consecutivo Gabinete Wever-Croes ta reconoce prensa riba e dia aki y pa e motibo aki dialuna mainta, 2 di september, den e sala di Consejo di Minister, e miembronan di prensa a comparti na un manera informal cu ministernan di Gabinete Wever-Croes.

Prome Minister Evelyn Wever-Croes durante e mainta aki a combersa riba e derecho di libertad di prensa cual ta un derecho fundamental y riba e importancia pa tin esaki bon ancla y cual na Aruba ta e caso. E mandatario a menciona cu e relacion entre prensa y Gobierno ta hopi importante ya cu prensa tin den su man e poder pa e mensahe di Gobierno por yega na cada un ciudadano di Aruba, y Gobierno tin aprecio y gradicimento pa miembronan di prensa cu ta trece e informacionnan corecto na e pueblo.

Despues di e palabranan di Prome Minister cada minister presente a tuma oportunidad pa felicita y gradici e miembronan di prensa reconociendo e labor duro y desafiante cu nan ta eherce cu ta fundamental pa Aruba. A pone enfasis riba respet y union, y e compromiso cu cada un di nan tin cu e berdad, pa asina construi un comunidad bon informa. Y manera e añanan anterior riba Dia Mundial di Prensa Prome Minister, den nomber di Gobierno di Aruba a duna un reconocimiento special. E aña aki esaki a bay pa TeleAruba como gradicimento pa e añanan di cooperacion y dedicacion pa




cu pais Aruba.

“Nos a pasa momentonan hopi ameno cu e miembronan di prensa. E relacion entre prensa y Gobierno ta hopi importante pa nos y p’esey nos ta dedica tempo na nan riba e fecha aki. Nos a invita nan awe den un setting informal pa nan desayuna hunto cu nos pa nos por combersa y intercambia di idea. Hopi pabien na tur miembro di prensa en general y danki pa e trabou cu boso ta haci. Cu Dios bendiciona boso tur pa sigui haci e trabou importante aki”, Prome Minister a expresa.



NOW PLAYING



It Ends With Us

Lily Bloom moves to Boston to chase her lifelong dream of opening her own business. A chance meeting with charming neurosurgeon Ryle Kincaid soon sparks an intense connection, but as the two fall deeply in love, she begins to see sides of Ryle that remind her of her parents' relationship. When Lily's first love, Atlas Corrigan, suddenly reenters her life, her relationship with Ryle gets upended, leaving her with an impossible choice.



ALIEN: Romulus

Space colonizers come face to face with the most terrifying life-form in the universe while scavenging the deep ends of a derelict space station.



Strange Darling

Nothing is what it seems when a twisted one-night stand spirals into a serial killer's vicious murder spree.



Widow Clicquot

The story behind the Veuve Clicquot champagne family and business that began in the late 18th century.

For Showtimes and Online Ticketing: www.caribbeancinemas.com

Fortaleza pa Famia

Cristo Hesus t'e unico solucion pa nos problema social

DICON nos ta bisa e Unico, pasobra Cristo Hesus a bisa den Mateo 28:18→Tur autoridad a wordo duna na Mi den cielo y riba tera.

Solamente Hesus por bisa; Bin cerca Mi tur cu ta cansa y carga y lo Mi duna boso sosiego (Mateo 11:28).

Y den Filipensenan 2:10-11 ta para skirbi: Cu p'e nomber di Hesus tur rudia mester dobla, di esnan riba tera y bao di tera, y cu tur lenga mester confesa cu Hesus Cristo ta Señor, p'e gloria di Dios Tata.

Awor nos ta confronta cu problema social, grandi caminda e famoso Placa y material cu hopi ta kere den dje, no por haci nada, pasobra e falta di respet, inmoralidad, perversidad, alcoholismo, adiccion, violencia, y bagamunderia cu hende ta bezig cu ne no tin pa placa pa combatie.

Seriedad y flata di respet, falta di temor di Dios, cherchamento di ley, y hasta bofon di Dios, a bira algo normal y hasta ora hende ta haci malo, y bay den rechazo di palabra di Dios, otro banda nan ta wordo aplaudi y apoya den tur forma.

Wak bon un situacion hopi facil y comun, si ley ta prohibi core auto burachi, y tanto durante siman y fin di siman tin accidente, pasobra hende ta core auto burachi, ta cherchamento di ley tin, (No tin respet) y hopi biaha den accidente hende inocente ta wordo involvi, kende si ta percura pa nan core na tino den trafico.

Hesus a bisa: Loke ta sali for di hende, ta esey ta loke ta contamina hende. Pasobra for di paden, for di curason di hende, ta sali mal pensamento, fornicacion, ladronia, matamento, adulterio, echonan di cudishi y maldad, tambe engaño sensualidad, envidia, calumnia, orguyo, bobedad. Tur e maldad aki ta sali for di paden di y ta contamina hende (Marco 7:20-23).

P'esey ta para skirbi den Isaías 5:20-21, Ay di esnan cu ta yama loke ta malo bon, y loke ta bon malo, loke ta scuridad luz, y loke ta luz scuridad, loke ta marga dushi, y loke ta dushi marga. Ay di esnan cu ta sabi den nan mes wowo, y prudente den nan mes bista.

E rebeldia cu ta aumenta bao di nos hubentud, y e falta



di respet pa nan propio mayor, ta algo cu mester hala nos tur su atencion, pasobra asina problema social lo sigui aumenta, pasobra deber di tur mayor ta pa instrui nan yiu den caminda di Señor.

E uzo di alcohol y droga bao di nos hubentud, ta nifica un falta di disciplina y coreccion den cas di famia, pasobra cada mayor mester por duna testimonio di decencia y respet na nan yiunan, nan ta prome modelo cu nan yiunan mester sigui, pero ora nan mes no conoce e caminda di Berdad y Bida, cual ta e caminda di nos Señor Cristo Hesus, anto nos tur ta mirando locual nos ta cosechando.

Mientras tin un cantidad ta gradua y bay studia den exterior, tin un gran cantidad, ta cana cu, pensamiento di gangster, pensamiento di baron di droga, pensamiento di bendedo di arma.

Y e palabra di Dios ta bisa nos den 2 Cronicanan 7:14 cu a yega e momento pa nos humiya nos mes y haci oracion na Dios.

Pasobra e solucion ta den man di nos Señor Hesus Cristo kende a bisa; No laga boso curason bira inrankil, kere den Dios, kere den Mi (Juan 14:1).

Y tur loke boso pidi den Mi nomber, esey lo Mi haci, pa e Tata wordo glorifica den e Yiu, Si boso pidi algo den Mi nomber lo mi hacie (Juan 14-13-14).



“Dios ta amor y amor ta Dios,
Maske mi no ta na e mundo aki, tur dia lo mi
ta banda di boso Curason, mi por stens di loke
Señor ta hasi”. - Salmo 33

Cu dolor na nos curason y agradecido pa tur
loke e la significa pa nos A bay sosega den
brasa di Altisimo nos Mama, Wela, Bisawela,
Tatarawela, Ruman y Tanta stima

Sra. Vuida Angelina
Danjo-Koolman

Mihor conoci como
“Angelica”, “Ca”, “Mamaca”
Salida di solo 25-07-1929
Bahada di solo 01-09-2024

Acto di entierio lo wordo anuncia despues.

Be on your guard;
stand firm in
the faith;
be courageous;
be strong.

1 Corinthians 16:13



The Lord is my shepherd,I shall not want.
Psalm 23.

With deep sorrow we announce the passing of our beloved:

Mrs. Violet Irene Cicilia Gibbs

*28-10-1932 - †28-08-2024

Husband: †Blasio Nicolas Cicilia (Chiquito)

Brother in law:Francisco Cicilia (Chico) and fam

Children: Marlene Gibbs (Molly), Usa
Rosita Patricia Simon and fam, Holland
Ricardo Alfonso Gibbs (Carlo), Holland
Roberto Ramon Simon (betto), Holland

Grand children: Cythia Violet Gibbs
Roberto Ramon Simon
Anthony Jelany Simon, Alysette Bernabela and fam

Great grand children: Djovainsly Bernabela, Holland
Djoraino Bernabela, Holland
Djoraily Bernanbela, Holland
Adam Simon, Holland
Kenzo Simon, Holland
Noor Simon, Holland

Brothers: Alberto (Bimbo) Richardson and fam, Aruba
Ettiene Richardson and fam, St. Maarten
†Clement Bernard Gibbs and fam, St. Maarten

Stepbrother: Lambertus Gibbs and fam, Statia

Stepsister: Monica Gibbs and fam, Holland

Nephews and Nieces: Tyron Richardson an fam, Holland
Jomaly Boekhoudt and fam, Holland
Eugene Richardson and fam, Aruba
Ettienne jr Richardson and fam, St.Maarten
Micheilla Richardson and fam, St. Maarten
Collins U. Gibbs, Statia
Roosevelt Gibbs, Statia
Anthony Gibbs St. Maarten
Elvin Gibbs, Statia
Cherry de Ruiter Arrindel, Holland

Great Nephew and Nieces: Steven Arrindell , Statia
Alfred Arrindell and fam, Holland
Roberto Richardson, Statia
Collin R. Gibbs, Statia
Regina Gibbs, Bonaire

Great Great Nieces: Subina Gibbs and fam, Statia
Savanah Gibbs, Statia

Cousins: Ivon Pompier and fam
Orelia Pompier and fam
Olivia Pompier and fam
Jacks Pompier and fam
Candic Pompier and fam
Shirley Pompier and fam
Cloudeett Pompier and family

Like family: Brenda Princess Simon
Ann Simon
Johnny Simon
Winston Simon
Malcom and Jullienene and fam
Snoeky and Susanne and fam
Gilbert and Ingrid and fam
Vera and fam
Jerry and fam

Bestfriends: Ana Pathoplet
Teresa Degraf (Sugar)
Iris Dunlock
Victor Whilfield
Celia Dunlock
Vivian Rivers
†Martina Sunnerville
Metlon and fam Arrindell

Was related to: Gibbs, Cicilia, Simon, Richardson,
Whitfield, Sommerville, Dunlock, degraf, Boekhoudt,
Bernabelle, Arrindell.

Viewing will take place at Pray Funeral Home, San
Nicolaas **Wednesday 4 th of September 2024** from 7pm to
9pm.

The funeral service will be held on **Thursday 5 th of
September 2024** from 10am till 12pm at Christ Church
Methodist Church, Amalia van Solmsstraat 1, San
Nicolaas. And from there to the cemetery at Sabana
Basora.

If we have forgotten to mention anyone, please accept
our sincere apology.
We apologize that after the funeral service we cannot
accept any condolences at home.



“Lagrima y flornan por seca, pero su
recuerdonan y tur loke el a haci y significa
pa nos, lo keda graba pa semper den nos
mente y corazon”
Salmo 62:1

Cu hopi dolor na nos curason pero
conforme cu Dios su boluntad nos ta
anuncia fayecimento inespera di nos ser
stima

Oscar
Augustin Bergrok

Cariñosamente yama “Osca”
*19 augustus 1954 - †29 augustus 2024

Na number di su:

Yiunan:

†Gilbert Conrad y Charlene Marlene
Bergrok-Geerman
Gwendeline Silvienne Bergrok

Nietonan:

Gilwert Iwan Bergrok - Kimberly Franken
Dywen Aeshan Bergrok

Ex Casa:

Silfia Erasmus

Mayornan:

Melius (Nel) y † Antonia Bergrok-Quandus

Rumannan:

Edgar (Ga) Bergrok
Geraldine (Gina) Bergrok- Willmard (Gino)
Solognier
Elaine

Sobrino:

Erwin Bergrok, Daniel Bergrok, Ashwin
Bergrok, Ashmar Bergrok, Ashberg Bergrok,
Ashanthe Solognier

Bon bisiña:

Famia Bermudez

Tanta y omo(nan), prima y primonan y
yiunan, tur su ihanan, padrino y madrina,
comer y compernan, amiga(nan) y
amigo(nan), conocirnan y bisiñanan di
Boegoeroei.

Demas famia:

Bergrok, Quandus, Erasmus, Geerman,
Solognier, Franken, Gomez, Tromp,
Bermudez, Britten, Guede, Leest, Toms,
Burke, Van der Valk, Van Leeuwen, Kooistra,
Eckmeyer, Voss, Hoek, Farro, Giel

Ta invita pa e acto di despedida cu lo
tuma lugar **diarason 4 september** na Aurora
Funeral Home & Crematory di 9or pa 11or di
mainta.

Acto di cremashon lo tuma lugar den seno
familiar.

Despues di cremashon no ta ricibi bishita di
condolencia na cas.

Nos disculpa si den nos tristesa nos por a
lubida cualkier persona.



Aurora
Royal Pray
Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu inmenso tristeza na nos curason, nos ta
participa fayecimento di

Arsenio R. Willems

Mihor conoci como: "Tilo"
*02-08-1960 - †28-08-2024

Acto di entierro lo wordo anuncia despues.



Aurora
Royal Pray
Funeral Home & Crematory

"Señor ta mi wardador, Mi'n tin falta di nada.
Den cunucu di yerba berde e ta poni sosega.
E ta hiba mi na awa trankil, Pa mi bolbe haya
forsa". - Salmo:23

Cu inmenso tristeza na nos curason nos ta
participa fayecimento di nos
Mama, Wela, Bisawela, Ruman y Tanta:

Sra. Aura Quandus-Lacle

Mihor conoci como "Aurita"
* 24 Augustus 2024 - † 31 Augustus 2024

Acto di entierro lo wordo anuncia despues



Aurora
Royal Pray
Funeral Home & Crematory

Kennisgeving van overlijden
en uitnodiging tot afscheid nemen.

Met diep leedwezen geven wij te kennen
dat na langdurig en hevig lijden toch
vredig is ingeslapen

Marjan Vermeulen

Geboren als
Adriana C. M. Vervenne
4 Mei 1951 – 30 Augustus 2024

Aruba - Frans Vermeulen
Nederland – Susan, Nora en Danique
Jeroen & Carine, Elise
Thijs

Wij nodigen alle familie, vrienden en
bekenden van Marjan en Frans uit om
afscheid van Marjan te nemen tijdens een
uitvaartplechtigheid die plaatsheeft op
Zaterdagmiddag 7 September tussen 14.00
en 16.00 uur in de grote zaal van het Aurora
Funeral Home & Crematory, Cumana #76.



Aurora
Royal Pray
Funeral Home & Crematory

Dios ta nos refugio,
E ta nos fortaleza,
El a resulta un yudador den mester.
Salmo 46:1

Cu dolor na nos curason, nos ta participa
fayecimento di nos ser stima:

Sady Sixto Ignacio

*06-08-1950 - †28-08-2024

Acto di entierro lo wordo anuncia despues



Aurora
Royal Pray
Funeral Home & Crematory

Lo E seka tur lágrima for di nan wowo, I morto
lo no eksisti mas: lo no tin nada di rou, nada di
yoramento, nada di dolo mas, pasobra tur kos
di antes a pasa bai. - Rev. 21:4

Ta anuncia fayecimento di:

Edith Damus

*07-10-1943 - †31-08-2024

Acto di entierro lo wordo anuncia despues



Aurora
Royal Pray
Funeral Home & Crematory

Cu inmenso dolor na nos Curazon, nos ta
anuncia fayecimento di:

Rosabella R. Fernandes do Nascimento-Harms

Mihor conoci como: "Bea"
*30-01-1957 † 27-08-2024

Bea a wordo crema dia 29 augustus 2024



Aurora
Royal Pray
Funeral Home & Crematory

Mi Dios, Mi Señor, Mi Salvador
Cu Bo amor infinito tenemi den Bo braza
Ya no tin scuridat
Unicamente Bo Luz briyando

Cu dolor na nos curason, nos ta anuncia
fayecimento di nos ser stima:

Jacinta Sarafilía Thijzen

Cariñosamente yama "Sara of Tanti Sara"
*09-09-1942 - †01-09-2024

Acto di entierro lo wordo anuncia despues

FOR WE LIVE BY
faith.
NOT BY SIGHT.
- 2 CORINTHIANS 5:7 -

Plachi pa graaf



Porcelana, granite of marble

- ✓ No ta cobra extra pa letter
- ✓ Servicio Rapido
- ✓ Installacion
- ✓ Material di Calidad
- ✓ Design

☎ 6990495



www.laycro.com



"No me llores, porque si lloras me apeno.
Encambio si tu me cantas yo siempre vivo y nunca me muero"

Juan Gilbertus Schwengle

Cariñosamente yama
"Viejo, Tati, Juany, Mr. Schwengle"
*06-10-1955 - †23-08-2024

Na number di:
Su forever love:
Odalayne "Oddy" Schwengle-Croes

Su yiu nan:
Josette Schwengle y Sandra Correa Ospina
Tahnee Schwengle
Nathan-John Schwengle

Su curazonnan:
Chanelle Odalayne y Clyde-John Maduro
Izaac Sean y Damian John La Croes
Jayden y Christopher Abma Correa

Mescos su nieto/a nan:
Jaydrick Odor, Nicole Robles, Abigail Kock, Aidan La Croes

Su rumannan:
Filomena "Mena" Schwengle y famia
Margarita "Greta" Schwengle y Famia
†Ingrid Odor-Schwengle y famia
Famia Schwengle na Hulanda

Stima manera ruman:
Amne Hamoud y famia
Diana y Marlon Pieters y famia
Juni y Ellen Pereira y famia
Esther Ofringa y famia

Su unico tanta stima:
Hendrika "Dika" y Edwin Angela-Marin

Su swa y cuña nan:
Aiza Croes y famia
Aldrich y Irene Croes y famia
Randall y Ana-Maria Croes y Famia
Roland Odor

Su subrino/a nan:
Christine, Krystle, Jarlath, Randall, Wesley y Nasya Kevin,
Johnathan, Celine, Silvianne

Su primo/a nan mas jega:
Mariana Jimenez y famia, Andres Garcia y famia, Alex Aponte
y famia, Vladimir de Cuba y Famia, Fidel de Cuba y Famia,
Mirta, Linda y Mieka Rasmijn y famia, Mayra v/d Linden y
famia, Famia Marin, Aurita Maduro y famia

Stima manera mama:
Magda Steenen y famia Daphne Arends y famia

Stima manera tanta: Erla y Marcia y famia

Su comadre y compadre nan stima:
Sonaly Fernandez y famia
Egbert Frigerio y famia Edi Diaz y famia
Rudje Arends y famia
Carlos Bulos y famia
Paul Croes y famia

Su amigo/a nan stima:
Blanca y Jorge, Carlos Molina, Zelda y Godfried, Carmen y
Bito, Mayon, Quetica y Brian, Armand, Harold y Yvone, Aurita,
Cinthia, Marieta, Emily, Estrellita, Mientje, Eveline, Anchie,
Elvia y Alex, Miriam, Desiree, Gloria, Benita, Minerva, Sharlene,
BabyJoy y famia, Zilia y famia, Jani y famia

Su bon amigo/a nan di:
Grupo Theatral Kibrahacha "GTK", DC Brothers, Colegio Gang
y Djiespies

Su ex-colega nan di:
St. Dominicus College, Directie Onderwijs Aruba, Scol di Amor,
Traimerdia, ECA NV y Mascaruba

Demas famia, amigo/a nan y conocir nan:
Schwengle, Croes, Marin, v/d Linden, Verhoeks, Odor, Aponte,
Angela, Jimenez, Wever, Rasmijn, Thijsen, Acosta, Rosales,
Maduro, Krozendijk, Valentijn, Boerman, Brokke, La Croes,
Fernandez, Tromp, de Cuba, Hernandez, Correa Ospina,
Garcia, Heymering, Ruiz, Fingal y Martinez

Un danki ta bai di curason na:
Dr. Joaquin v Trigt y staff
Dr. Casper Lacle y staff
Dr. Romeo Kock y staff
Personal di Ambulance y polis cu a lucha te na fin

Su ayudante nan di cas: Milena, Pedro, Julio y Surette

Ta invita pa e acto di condolencia dia **2 September 2024** di
7.00pm - 9.00pm na Aurora Funeral Home. Despedida lo tuma
lugar dia **3 September 2024** di 1.00pm - 4.00pm na Aurora
Funeral Home.

Nos disculpa si por a lubida di pone algun famia, amigo/a of
conocir. Despues di despedida nos NO ta ricibi bishita na cas.



"Señor ta mi wardador, mi'n tin falta di nada
Den cunucu di yerba berde e ta ponemi sosoga.
E ta hibami na awa frankil,
Pa mi bolbe haña forsa".
Salmo: 23

Cu profundo tristesa den nos curason, nos ta
anuncia fayecimento di nos casa, tata, ruman,
omo, primo y amigo stima:

Arsenio Rutilio Willems

Mihor conoci como:"Tilo"
*02-08-1960 - †28-08-2024

Na number di su:
Casa:
Joyce Violeta Willems-Boekhout

Unico yiu:
Jayant Arsone Willems

Mayornan:
†Julita Willems
†Mario Willems

Rumannan:
Louis Willems y esposa
Arquimedes Willems y famia na spaña
Mary-ann Willems, pareha y yiu nan
Irene Willems y yiu nan
Jasmira van der Beek-Willems y famia
Gilberto Willems y famia
Allan Willems, Mariela, Marienne

Suegra:
†Petra Boekhout

Swa y cuñanan:
†Cornelis Boekhout y famia
Aida Harms y famia
†Hose Boekhout y famia
†Rosa Harms y famia
Ronny Boekhout y famia
†Chicka Wijshijer y famia
Lydia Boekhout
Mario Boekhout
Modesto Werleman

Tanta y omo, primo y primanan, ex
coleganan di Barcelo Hotel

Demas famia:
Willems-Boekhout, van Beek, Garcia, Kelly,
Maduro-Wever, Croes, Lozano, Dominguez,
Earlineton, Kwidama, Albertsz, Peña,
Koolman, Werleman, Harms, Henriquez,
Leon, Tromp y Winterdaal

Ta invita tur famia, amigo(a)nan y
conociran pa asisti na e acto di entierro
cual lo tuma lugar **Diasabra 7 di September
2024** for di 2 pm pa 4 pm na Misa
Inmaculada Concepcion na Sta. Cruz y
despues lo sali pa santana catolico na Sta.
Cruz

Nos disculpa si den nos tristesa nos por a
lubida un miembro di famia

Nos ta lamenta cu despues di entierro no
por ricibi bishita di condolencia na cas



Salmo 23. "Señor ta mi wardador mi n' tin falta di
nada. Maske mi pasa den e klof di mas skur mi n'
tin miedo di nada"
Cu imenso dolor y tristesa na nos curason nos ta
anuncia fallecimiento di:

Sra Vda. Higinia
Marciana Victorina Ras

Mihor conoci como Ina, Inche, Ind
Ina La Bailarina.
Casa di † Carlos Boekhoudt
*06-03-1954 - †27-08-2024

Mama:
† Anna Grovell

Tata:
† Hyacintho Ras

Padrastro:
† Sylvio Cominencia

Su yuinan:
Micheal Ras y yui
Gregory y Carolina Sanchez y Victoria Sanchez
Anthony Sanchez y yui
Angelo Sanchez y yui nan

Nieta Stima Manera yui:
Naomi Wilson y Chris Dirksz y yiu nan

Su Rumannan:
Diana Ras y Freddy Kelly y yiu nan
Norma Ras y Jairo Violenus y yiu nan
Freddy y Lisette Ras-Rodriquez y yiu nan
Seagrid y Nel Frank-Ras y yiu nan
†Hyacintho Ras y yiu nan
Claudia y Tino van der Biezen-Ras y yiu nan

Nieto y Nietanan, Bisanieto y Bisanieta nan, Tanta
y Omo nan, Primo y Prima nan
Subrino y Subrina nan / Iha nan / Swa y Cuña
nan.

Su bon Amigo di Cas:
Roy Sneek
Chito Volk
Rose Volk di Corsow

Demas Famianan y conocir mucho hopi pa
menciona na Aruba, Hulanda, Corsow, Boneiro,
USA, Inglatera. Grupo di fiesta / Grupo di Song
Festival bot.

Su ex-colega nan di Renaissance Island Aruba /
RED Sail Sport (Peter de Hoog),
Aura Bremo (Iotto)
Amigo nan piscado

Na Number di Famia y conociran: Ras,
Boekhoudt, Grovell, Geerman, Sanchez, Aparicio,
Kelly, Violenus, Rodriquez, Frank, van der Biezen,
Wilson, Donata, Franken, Matos, Kock, Solognier,
Bislip, Quant, Ridderstap, Goeloe, van der Linden,
Tromp, Casuela, Panneflek, Paesch, Schwengle,
Gamara, Wouters, Simon, Flanders, Silberie, Ruiz,
Werleman, Jansen, Lejuez, Lopes.

Demas Famia nan y Conocir nan na Corsow:
Cominencia, Martina, Maduro, Julia.

Deseo di defunto ta pa bisti alegre, enbes di flor
lo tin un box disponibel pa hasi donacion pa
Hospice Atardi

Despensa si den nos tristeza nos por a lubida
algun familiar y amigo nan.

Ta invita tur famia, amigo, bisiña y conocir nan
pa asisti na acto di condolencia cual lo tuma
lugar **Dialuna 2 September 2024** di 7pm -9pm.
Creamacion **Diamars 3 September 2024** di 2pm –
4pm atardi na Pray Funeral Home San Nicolas.



Scan nos QR code y bira abonado di AWEMainta

Completamente GRATIS

1: Usando bo camera di telefon,
scan nos QR code na banda.

2. Bay riba "Show Options",
"Open in browser".

3. Yena e formulario.

**Haya AWEMainta
tur dia den bo inbox!**



www.awemainta.com



www.facebook.com/AWEMainta



5880022



noticia@awemainta.com
aviso@awemainta.com